



Republika e Kosovës
Republika Kosovo / Republic of Kosovo
Kuvendi i Komunës Rahovec
Skupština Opštine Orahovac / Municipal Assembly of Rahovec



PROCESVERBAL

Nga mbledhja e pestë (5) e rregullt e Kuvendit Komunal të Rahovecit, e mbajtur më **31.05.2022**, me fillim në ora **10:00**. Mbledhjen e kryesoi: Kryesuesi i Kuvendit z. **Defrim Kafexhiu**. Konstatohet se kuorum, për mbajtjen e mbledhjes kemi:

Kryesuesi – Fillimisht më lejoni t'iu përshëndes, i nderuar **Kryetar i Komunës z. Smajl Latifi**, nënkryetar i Komunës z. **Fatmir Iska**, të nderuar kuvendarë, drejtor të drektorive Komunale, përfaqësues të mediave dhe ju gjithë të pranishëm.

Të nderuar kuvendarë, për këtë mbledhje sot propozojmë këtë :

REND DITE

RAHOVEC / ORAHOVAC	
Njësia Nr./Br./No <u>01/Kuvendi i Komunës</u>	
Nr./Br./No <u>351/16</u>	tit. i faq./Br.str./No.pg. <u>01</u>
Data/Datum/Date <u>31.05.2022</u>	

1. Shqyrtimi dhe aprovimi i Procesverbalit nga mbledhja e kaluar,
2. Pyetjet dhe përgjigjet në pyetjet e kuvendarëve,
3. Shqyrtimi dhe miratimi i vendimit për bartjen e mjeteve rezervë në investime kapitale,
4. Shqyrtimi dhe miratimi i vendimit për themelimin e Komiteteve për Arsim dhe Komitetit për Shëndetësi dhe Përkujdesje Sociale,
5. Shqyrtimi dhe miratimi i vendimit për përbërjen dhe organizimin e Komitetit për Arsim,
6. Shqyrtimi dhe miratimi i vendimit për përbërjen dhe organizimin e Komitetit për Shëndetësi dhe Përkujdesje Sociale,
7. Shqyrtimi dhe miratimi i Draft rregullores për dhënien e titujve të nderit, dekoratave dhe çmimeve nga Komuna e Rahovecit,
8. Shqyrtimi dhe miratimi i vendimit për aprovimin e listës së anëtarëve të zgjedhur të Këshillit të Fshatit Hoçë e Madhe,
9. Shqyrtimi dhe miratimi i vendimit për ndryshimin dhe plotësimin e vendimit 01 Nr.296/22, i datës 30.03.2022 për caktimin e lokacionit për ndërtimin e morgut për nevojat e komunitetit të fshatit Hoçë e Vogël,
10. Shqyrtimi dhe miratimi i vendimit për ndryshimin dhe plotësimin e vendimit 01 Nr.295/22, i datës 30.03.2022 për caktimin e lokacionit për ndërtimin e objektit për zhvillimin e aktiviteteve të ndryshme për nevojat e komunitetit të fshatit Çifllak,
11. Raporti vjetor i punës së komitetit të auditimit për vitin 2021.

Arbër Zenuni - Faleminderit kryesues, i nderuar kryetar i komunës z. Smajl Latifi, i nderuar nënkryetar z. Fatmir Iska, drejtor te drejtorive, kolegë asamblastë dhe gjithë pranishmit ne sallë. Në emër të grupit të AAK-së i kemi për propozim dy pika: e para është shpallja në interes të përgjithshëm publik për parcelat P-715/1300502756/0 në zonën kadastrale në Krushë të Madhe. Me datë 23 (e shtune) kemi mbajtur një takim me qytetarët e Krushës së Madhe ku kanë qenë pranishëm edhe kolegë asamblastë, njëri prej tyre edhe z. Sejfullah Sejfullahu, ku bashkëbisedimi ishte në lidhje me projekt-propozimin për zonën që do të shpallet në interes të përgjithshëm nga komuna e Rahovecit. Zona e quajtur "Paca Paca" është në interes të komunitetit dhe qytetarëve të Krushës së Madhe dhe të gjitha bizneseve të cilat kanë shpreh interes që në të ardhmen të kenë një vend ku të investojnë. Pika e dytë: projekt-vendimi për caktimin e lokacionit për hapësirë për biznese në komunën e Rahovecit, parcela kadastrale sipas certifikatës së pronësisë P-715/1300501704/0 në zonën kadastrale në Krushë të Madhe në vendin e quajtur "Rasa Sprud" me sipërfaqe të përgjithshme 143.712 metra në katror, parcela tjetër sipas certifikatës së pronësisë me nr. P-715-130050274/0 në zonën kadastrale Krushë e Madhe në po të njëjtin vend të quajtur "Rasa Sprud" me sipërfaqe të përgjithshme prej 381.960 metra në katror. Pra, janë tre parcela që përfshihen diku rreth 70ha që janë në interes për të gjithë ata që dëshirojnë të investojnë. Atëherë ne si grup i Aleancës kërkojmë nga ju që t'i fusim në rend dite këto dy pika dhe të kalojmë më tutje.

Kryesuesi – Faleminderit Arbër, nëse dikush prej asamblastëve ka nevojë për informata shtesë prej ndonjërit prej drejtorëve në lidhje me këto dy propozime të grupit të Aleancës, urdhëroni? Nëse jo, atëherë po i vendosim këto dy propozime...Drejtori e ka fjalën për informata shtesë rreth këtij propozimi.

Afrim Oruqi - Faleminderit kryesues, i nderuar kryetar, nënkryetar, kolegë drejtorë, të nderuar asamblastë. kemi provuar edhe bashkërisht me juve dhe me anëtarë të KPF-së dhe në mbledhjen e prillit që t'i fusim në rend dite këto dy pika, keni kërkuar informata shtesë, historiatin e këtyre parcelave. Drejtorja për gjeodezi, kadastër dhe pronë ka bërë historiatin e këtyre tri parcelave, përfaqësuesit ligjorë të komunës kanë kërkuar prej gjykatës themelore në Gjakovë- nëndega në Rahovec informata nëse kemi konteste të hapura me këto parcela, përgjigja e tyre ishte që nuk ka konteste, nuk ka pretendues, nuk ka procedura të hapura në gjykatë. Këto tri parcela, dy parcela të komunës dhe një që është pronë shtetërore e Kosovës KK Rahovec –Ujërat, janë parcelë komunale prej vitit 50-të kur edhe është formuar kadastra përshtkruese. Po kërkojmë prej juve për shpallje në interes të përgjithshëm, më pas prape do të vijmë këtu që ta shihni projektin dhe që t'i ndajmë këto parcela, se cila parcelë do t'i takoj bizneseve, cila blegtorisë e cila bujqësisë. Kemi qenë në Krushë ashtu siç e tha edhe kuvendari Arbër Zenuni, jemi takuar me përfaqësues të zonës, të bizneseve, të asamblesë komunale të zonës atje dhe nuk kemi pas probleme, kemi biseduar më shumë për parkun në fshat se sa për këto hapësira. Kërkojmë prej juve që mos të vonohemi sepse jemi duke u përpjekur në qershor ta kemi Xërxën dhe më pas vazhdojmë me zona tjera aty ku kemi zona të lira.

Rasim Fazliu – Faleminderit kryesues, përshëndetje për juve, kryetarin e komunës, nënkryetarin, anëtarë të kuvendit komunal, drejtorë, përfaqësues të mediave dhe të gjithë të pranishmit këtu.

Konsideroj që ata që kanë kërkuar që këto pika të rendit të ditës të largohen t'a marrin fjalën dhe të japin sqarime rreth asaj që ka ndodh në debat aty, sa janë pajtuar qytetarët në mënyrë një pasqyrë pak më të qartë, në fakt kjo pikë është shtyrë pa nevojë, sipas meje çdo here kur kemi të bëjmë me interes të përgjithshëm, nuk ka nevojë të vijmë në këtë pikë që jemi tani. Drejtori kur tha që nuk kemi biseduar shumë për këtë çështje me qytetarët atje pak më shqetësoi sepse për këtë punë është mbajtur debati-konsultimi me qytetarë, sidoqoftë kërkoj sqarime shtesë e më pas dalim në votim, faleminderit.

Kryetari – Faleminderit kryesues, nënkryetar, drejtorë, anëtarë të kuvendit, mediat, monitoruesit e kësaj mbledhjeje, mirëserdhe Fahrije Lushi. Ne kemi qenë në Krushë, kam qenë pjesë e takimit, dëshiroj t'a plotësoj pak drejtorin e drejtorisë dhe Arbërin. Është prezantuar projekti me harta, skica dhe historiatin para qytetarëve të pranishëm. Është shumë e vërtetë që takimi ka marr një dimension tjetër, sepse qytetarët janë interesuar edhe rreth objekteve që janë në qendër të Krushës. Sipas historiatit që e posedojmë ne, gjithçka është pastër

dhe kemi ardh në konkluzioni që është edhe detyrim ligjor nëse hasim diçka në proces në të ardhmen, ne të drejtën mbi pronën private-publike me ligj e kemi të rregulluar dhe po kërkojmë mbrojtjen e asaj parcele dhe çdo parcelë tjetër me vendim të kuvendit të komunës, duke shpallur në interes të përgjithshëm dhe pasta të fillojmë debatet tjera për hartimin e projekteve ideore me kuvendit e komunës duke vendosur se çka të bëhet tutje. Unë besoj që në kuadër të detyrimit që kemi, propozimi është me vend dhe gjithçka çka ndodh në këto zona atëherë përsëri kuvendi i komunës si institucioni që i jep vulën dhe në momentin që krijohet ajo zonë apo ajo hapësirë për biznese ju cakton afatin kohëzgjatjen sa mundet m'ju dhanë dhe kuvendi i komunës është ai që vendos krejt në fund. Po ashtu kanë qenë edhe anëtarët e komitetit për Politike dhe Financa por jo te gjithë si Sejfullah Sejfullahu nga Krusha e Madhe, Sinan Kryeziu nga Xerxa, Ilir Pallqa nga Rahoveci, Rumir Zhuniqi nga Fortesa dhe Besmire Bytyqi nga Opterusha. Kështu që unë po besoj që shtyrja ka ndodhur me mirëkuptim dhe ne kemi marr disa veprime dhe kemi obliguar drejtorinë që me nxjerr krejt çka ka aty dhe ka dal gjithçka pastër. E vërteta është që me vendimin e kuvendit të komunës që ne mundemi me ardh në një situatë me të favorshme ligjore por edhe me të favorshme me mundësi në të ardhmen dhe në momentin që bëjmë buxhet dhe bëjmë përgatitjen e zonës dhe aftësimin e atyre parcelave me infrastrukturë, përsëri vendos kuvendi i komunës se çfarë do të ndodhë, pasi në ende nuk e kemi projektin ideor dhe as projektin kryesor dhe as nuk e kemi parcializimin e zonës. Pasi krejt këto në proces bëhen dhe po besoj që kuvendi i komunës ka me pas një rol vendimtar dhe do t'i jep legalitetin në situatën e mëvonshme në një situatë tjetër kurdo që jepen në shfrytëzim ato edhe për kohëzgjatjen dhe plot tema tjera. Kështu që unë jam i tharë që me shpall paracaktuar me interes të përgjithshëm kudo që ka në komunën e Rahovecit, pasi e para që me këtë vendim në mbrojmë pronën tonë, pastaj e dyta ne japim mundësi që me administru me pronën tonë dhe çka po dëshirojmë me bo me atë pronë dhe çfarë vizioni kemi si institucione të zgjedhura për ato prona që i mbrojmë me vendim të kuvendit. Kështu që do të ishte mirë me votu dhe gjithashtu e pres edhe komentin e asamblistit Sejfullah Sejfullahu dhe po besoj që ka qenë në një vështirësi për shkak të paqartësive të cilat jo rrallë krijohen por sigurisht se e ka kuptu se edhe ai kanë të gjithë ata qytetare që kanë marr pjesë i kanë dokumentet dhe historiatin e asaj zone kështu që e kanë pa se aty gjithçka është komunës pavarësisht se pretendimet tona janë legjitime që kanë mundur me qenë në kohërat e hershme me plot situata të cilat jemi të vetëdijshëm sepse kemi kaluar në procese jashtëzakonisht të vështira edhe historike. Por nga vitet e 50-ta sipas kadastrit tekstual përshkruet, ne jemi në rregull me ato prona dhe uroj që të jemi në rregull madje edhe me prona tjera që do t'i kemi të lira ndoshta në Celin, Xerxe, në qytet apo edhe kudo neper vendbanimet tona.

Sejfullah Sejfullahu – Faleminderit kryesues, përshëndetje kryetar, drejtora, asamblistë, media dhe gjithë të pranishmit në sallë. Është shumë vërtet që ndoshta debati është shterur sipas juve, por po ju përgjigjem juve Rasim Fazliu dhe juve Arbër Zenuni. Në fillim kur ka ardh kjo, kam kërkuar me mirëkuptim që me shty për shkak të paqartësive dhe presionit që kam pasur. Çuditërisht nuk po di me bo politike por sigurisht që ma merr mendja që edhe ty Berat Duraku e po ashtu edhe ty Arbër Zenuni që edhe juve ju kanë bërë presion por që ju po mbani në vete mirëpo unë po e shprehim haptas që me kanë bërë presion dhe për një gjë të tillë publikisht edhe të gjithë asamblistët ju kam falënderuar për shtyrjen. Kur jeni ardh herën e parë në takim, jemi dakorduar që me sjellë edhe dokumentin e kadastrit por në ndërkohë ju pata thënë që para se me u mbajt takimi i dytë dhe para se me shku në Komitetin për Politike dhe Financa kemi pas mosmarrëveshje dhe keni ardh edhe herën tjetër. Arbri e arsyetoj atë që e tha por të paktën u deshtë me bisedua me mua pasi të dytë jemi po nga i njëjti vend, pasi edhe shumë me herët kemi pasur biseda mes vete dhe i kemi shqyrtuar këtë temë dhe jemi dakorduar që kemi shumë telashe për këtë çështje mirëpo sido që të jet është propozimi i tij. Po ashtu është e vërtet se kemi bërë debat edhe pse në raport me mu jemi marr vesh se nuk kemi asnjë lloj problemi apo vërejtje mirëpo me ata shfrytëzues nuk jemi marr vesh pasi me tepër kemi folur për shitoren dhe lokalitetin që punon si berber pasi që debati eskaloj ashtu dhe problemi është se nuk e di se çka me nxitim ajo punë pasi unë si Sefë edhe njëherë ju falënderoj për angazhimin dhe gatishmërinë që keni ardh edhe keni dëshmuar gjithçka, por përsëri kam presion rreth kësaj edhe pse ju thonë që e kemi rregulluar mirëpo disa prej

tyre me janë ankuar dhe tash nuk e di tash a jeni pajtuar që dikujt me ju prekë parcela dhe dikujt me ju prekë parcela dhe nëse behet ajo do te behet për te gjithë dhe e di që komuna ka me shpall zone me interes te përgjithshëm pasi aty veç bari me mbjell do te behet me bukur se sa që është tani dhe nuk dyshoj që ka ndonjë prapavijë pasi që nëse ka atëherë secili do ti bart pasojat por që duhen sqaruar gjërat. Kështu që nëse e votoj unë këtë pike te rendit te ditës atëherë ata njerëz do te thonë që asamblisti i Krushes Sejfullah Sejfullahu ka votuar për me shit dhe me ja dhanë komunës mirëpo nëse nuk e votoj sikur e kam një bindje se atje do te behet bukur diçka sigurisht se brenda periudhës 10 vjeçare do te behet me bukur se sa që është tani dhe do te më mbrehë ndërgjegjja që unë nuk e kam votuar, kështu që unë si Sefë do te abstenoj, kështu që ju them se ju nuk jeni marr me ata njerëz por sinqerisht ju them se nuk jam duke u shqetësuar se kush kërcënon apo nuk kërcënon, pasi nuk mund te kërkoj nga asamblistët që me votu apo mos me votu, pasi secili i din punët e veta dhe unë e shpreha qëndrimin tim dhe ju falënderoj që keni qenë dy herë megjithëse ka vërejtje edhe ajo pasi kane paralajmëruar disa orë me përpara mirëpo vetëm disa vishën ne takim dhe ndoshta pikërisht ata që vinin nuk kishin te bënin me ato prona dhe sigurisht që me ka ardh keq që ka eskalu krejt për diçka tjetër, por sido që të jetë nuk kam ndonjë vërejtje konkrete edhe pse jeni përgjigjur ne pyetjet e mira që nga fillimi mirëpo kjo është paksa me nxitim dhe për këtë jam shume i shqetësuar për këtë për rikthimin e qeverisë për me vazhdu me privatizim edhe mua me ka shqetësuar ky problem sinqerisht kështu që le te mbetet përgjegjësi e pjesës juridike.

Kryetari – E mbajta ne mendje krejt fjalimin e Sefës por edhe këtë te fundit ku tha që është shqetësuese që qeveria e Kosovës e ka aktivizuar çështjen e privatizimit dhe kanë fillu edhe me u lansu prona dhe me u shpall projekte. Pra është një standard që ne njohim pasi ekziston rreziku potencial që pronat e komunës e sidomos ajo prona e ujërave. Kështu që me u interesua dikush ne kemi te dhëna edhe te tjera te cilat besoj që edhe Sefa edhe gjithë te tjerët e kuptojnë, pasi ekziston rreziku që një ditë me qenë para aktit te kryer pasi AKP-ja pasi veç e njofton komunën dhe nuk e vet hiq e sidomos për prona që ne njëfarë mënyre menaxhohen nga AKP-ja siç ka edhe nga agjencioni pyjor te Kosovës që edhe aty munden me u privatizu dhe munden me ju dhanë ne shfrytëzim. Pra ne njëfarë mënyrë vendimi i kuvendit te komunës e mbron pronën edhe nga pretenduesit e sotëm që mund te kenë pretendime legjitime por jo te faktueme por edhe nga privatizuesit potencial te nesërme pa pasur nevojë hiq me u aktivizu AKP-ja pasi që ne jemi dëshmitar te plotë pronave që na kanë ikur pasi kanë gjetur te tjerët hapësira ligjore dhe i kanë bërë pronat komunale dhe një prej tyre është ne fshatin tim Ratkoc pikërisht ne vendin ku është tregu tash është pronë private edhe pse ka qenë pronë e pastër pronë komunale dhe ne plot vende tjera dhe pa pasur nevojë AKP-ka ata kanë gjetur avokat dhe plot dëshmitar pasi ata lëndë e disponoj ne tërësi dhe sot ajo është pronë private. Kurse sa i takon shfrytëzuesve që nuk e kanë verdiktin e organeve kompetente cila do qofshin ato, ne do te ju ofrojmë zgjidhje pasi që ligji ka paraparë zgjidhje edhe për ata. Por ndoshta ka nevojë me pa mundësinë që a do te ishte mirë që ne planin afatshkurtër me emergjencë organet tona me vepru ndaj atyre që ndoshta nuk e kanë një pëlqim punë per me operu ne prona komunale, pasi që kemi aso situata dhe mund te kemi ne ato parcela për te cilat folëm dhe unë e di saktë se kush janë pasi janë edhe miçë tanë por mos te harrojmë se e kemi edhe një situatë edhe ne qytet tek stacioni i autobusëve ne Rahovec që megjithatë është gjetur mënyra që ajo pronë me u liru prej shfrytëzuesve që nuk e kanë një verdikt legal pra një vendim apo pëlqim dhe tash ajo pronë është pastruar. Kështu që tash e kujt do te behet ajo pronë dhe kujt do ti mbetet pasi ne kemi bërë një veprim te mirë pasi nuk e kemi pasur te lehte pasi është pikërisht ne qendër dhe dikush ka oper aty si biznes dhe nuk dëshirojmë me fol me gjuhen e vrazhdë pasi e kemi gjuhen e ligjit dhe inspektorati vepron pikërisht për ato punë por nuk po besoj që bën mirë dikush nëse ne nuk marrim angazhim te nxjerrim një verdikt bashke si kuvend i komunës, pasi vërtet unë nuk kam te drejtë vote sepse do te votoja me plot përgjegjësi pasi e di nga përvoja ime si kryetar i komunës që na ka ndodhur neve me prona neper komuna edhe gjithë Kosovës sigurisht. Prandaj ju kisha lutur që ta mbrojmë me vendim tonin dhe prona mbetet e jona dhe me pastaj çfarë do te bëjmë me ata që nuk e kanë pëlqimin me operu tash apo që kanë operu deri tash por nuk duhet te

harrojmë që kemi obligim me ndërmarr edhe veprime te natyrave tjera sepse e mbrojmë prej keq shfrytëzimit apo shfrytëzimi i paligjshëm një pronë që është e jona. Unë po besoj që janë një apo dy njerëz që janë miçë tanë dhe që është e kuptueshme që ka një presion dhe unë e kam inqizu gjendjen bukur thellë dhe e disponojmë krejt materialin dhe ku me marr edhe ne me pas dokumente që e sfidojnë vendimin e kuvendit komunal pra dokumente te pronarëve privat dhe sigurisht se ne do te dorëzohemi sepse jemi te detyruar dhe te obliguar ligjërisht. Pra është mirë që ka nisur me Krushen dhe ne po shfrytëzojmë me gjet prona nëse kemi ne Xërxe për shkak se kërkojnë hapësira për biznese dhe po ashtu ne periferi te qytetit dhe jemi duke shikuar mundësin që me ja marr ne menaxhim edhe AKP-së pasi ju kemi drejtuar me shkresa dhe ju e dini edhe për pronën që ka vendos ky kuvend te shkolla Sadedin Hajda pastaj ju kemi drejtuar edhe agjencionit pyjor te qendra e regjistrimit civil tek ndërtesa e KRU-Gjakova, pra ne jemi te interesuar që me pas sa me shume prona me pas ne menaxhim për shkak se po na duhen për zhvillime pozitive ne këtë vend kurse a na japin apo jo por detyra jonë është edhe me vendim te kuvendit te komunës që ta dini që ne atë parcelën që ka pëlqim apo menaxhim bashkësia e ujërave ka mundësi që vendimi i kuvendit te komunës na ndihmon neve që me pas edhe atë hapësirë apo pronë me pas komuna ne menaxhim e që sot e ka dikush tjetër.

Kështu që materialin e ka te gatshëm drejtori Afrim Oruqi për secilin për ju edhe ka argumente te padiskutueshme ne kuptimin ligjor edhe pastërtia e historiatit te pronës është krejt ne rregull. Komiteti për Politike dhe Financa ka kërkuar që me gjete kohë që me shfrytëzuar maksimalisht kohen edhe po besoj që e kemi kapitalizue dhe unë kom pas dëshirë me qenë atë debat Burimi, Bejta që janë kon te ftuar por unë e di që është konsumuar edhe debati edhe ne fushën e argumenteve kemi nxjerrë atë që i takon një organi te caktuar siç është drejtorja për gjeodezi kadastër dhe pronë dhe gjithçka është pastër. Sa i takon presionit lirisht mundeni te ju thuani krushjanve se kryetari i Komunës ka marr vendim që me i mbrojte pronën e komunës se Rahovecit bashkë me kuvendin e Komunës. Por sigurisht që lirisht mund te ju them se nuk ka tension edhe pse ne fillim ka pasur pak mirëpo tani është pastruar tani. Mund te ju them se prona ne Rahovec është pak me ndryshe pasi ka kapak konteste, si kjo te stacioni atë vend e kemi rrafshuar mirëpo nuk guxojmë me veprua kurrëgjë njëherë, dhe e kemi largu ne shfrytëzimi jo I drejtë jo I ligjshëm pasi dikush dikujt I ka marr qira dhe dihet ajo histori. Kështu që tash është pastër dhe s'ka asnjë lloj kontesti.

Sejfullah Sejfullahu – Nuk jam i shqetësuar pasi nuk kam ndonjë pretendim për atje dhe nuk kam ndonjë pronë timen atje. Mirëpo problemi qëndron se si autokritik që jam po e konsideroj që jam edhe unë pjesë, e shfrytëzuesve atje, ju duhet ta shikoni çështjen juridike pra te AKP-së pasi ka mbi 20 vjet që jemi marr me këtë çështje për me i nxjerr ata njerëz që kanë prona aty por nuk kanë mundur te bëjnë asgjë. Kështu që juridikisht prej tyre hiq mos ke dert pasi për te gjithë ata matrapazë që kanë bërë prona nuk mundet me bo asgjë pasi skan lan mjet pa përdor për shkak te dokumentacionit, por e kemi problemin vetëm me AKP-në dhe me askënd tjetër.

Bejtullah Deliu – Përshëndetje kryesues, kryetar, nënkryetar, drejtor te drejtorive, kolege asamblistë, media dhe gjithë ju te pranishëm. Edhe pse pak me vonesë erdha dhe nuk isha që nga fillimi i debatit te kësaj pike por jam i mishëruar goxha shume rreth asaj që ka ndodhur me herët. Ne, është fakt që kemi kërkuar me u mbajt një takim me qytetaret krushjan lidhur me këtë temë dhe jemi marr vesh që me u mbajt te hënën mirëpo emaili ka ardh edhe ky takim është mbajtur te shtunën. Kështu që me dëshirë do te kisha marr pjesë por ka ndërrua dita e mbajtjes se këtij takimi pasi jemi marr vesh që te mbahet te hënën mirëpo është mbajtur te shtunën, kështu që nuk është që nuk kemi marr pjesë pasi me gjithë dëshirë do te kishim marr pjesë pasi jemi marr vesh që me u mbajt ditën e Hënë dhe nuk ekziston asnjë rrezik për këtë pronë e qysh janë rrethanat e që po e dokumentoni me te gjitha atëherë pse nuk po mirëkuptohemi edhe njëherë që ne seancën e radhës ne mënyrë te rregullt pa i shtu pikat që te hyje edhe kjo si pike e rendit te ditës, pra le te vjen si pikë e rregullt e rendit te ditës ne seancë pasi ne Komitet për Politik dhe Financa është tërhequr që ta mbajmë këtë vijë dhe te rregullohet gjithçka.

Kryetari – Unë besoj që ky kalu neper filtrin e Komitetit për Politike dhe Financa dhe me siguri edhe aty është debatu dhe madje është debatu edhe ne kuvend jo mjaftueshëm dhe si konkluzë ka dal edhe një takim që dikush ka propozuar me pronaret shfrytëzuesit e dikush ka thënë që komiteti për Politike dhe financa me qenë aty dhe realisht kjo ka ndodh ndërsa për datën që u mbajt te shtunën për shkak se te hënën e kemi pasur serinë e konsultimeve publike pasi që janë 14 ditë përpara te njoftuar dhe nuk kemi dashur që me prish agjendën e kryetarit te komunës dhe kjo ka qenë çështja e gjitha. Unë po mendoj se kjo është e rregullt për shkak se ju ka nënshtruar këtyre filtrave edhe KPF-së edhe po ashtu është debatu ne kuvend dhe gjithashtu është debatu mjaftueshëm po besoj edhe ne Krushe te Madhe dhe sa i takon parandalimit, ne nuk mundemi me qenë te sigurt për asgjë sot për shkak se çudia me e madhe është për shkak se nuk i kemi mbrojt deri tash dhe nuk i kemi shpallur me interes te përgjithshëm deri tani jo vetëm ato prona por edhe shume te tjera sepse ne momentin kur merret vendimi i kuvendit te komunës atëherë ju jeni saktë dhe atëherë nuk ka mundësi me ndërhyje askush as gjykata dhe gjithçka merr fund dhe po besoj që ne jemi te vonuar madje edhe për shkak te agjendës që kemi edhe si kuvend i komunës e po ashtu edhe agjendës se kryetarit te komunës dhe te ekipit te tij pasi disa punë duhet te kryhen me shpejt. Nuk e kemi larguar gjithë rrezikun pasi dikush e përmendi se kurrkush s'ka rrezik prej kurrkujt pasi unë mendoj se ne kemi rrezik pasi dëshmi te mjaftueshme pasi edhe sot vazhdojnë gjuetaret e pronave dhe imagjinoni që kuvendi i komunës e ka materialin e gatshëm ne dorë te plotë dhe madje mund ta plotësojmë edhe me tutje që mund te shpërndajmë për secilin dhe dikush thotë që me shty me mirëkuptim. Mirëpo unë mendoj që nuk kemi arsye me shtyje si kuvend i komunës për diçka që është e gatshme dhe e pastër që me bo kaq shume debat kur faktet dhe argumentet janë ne favor te kuvendit te komunës se Rahovecit. Prandaj mos harroni që nëse futemi thelle e me thelle atëherë faktet që ne i disponojmë edhe për ato parcela, neve na obligojnë edhe për diçka tjetër që me hije ne veprime edhe me te veçanta me inspektor edhe me njësi te veçanta te policisë. Pasi që shfrytëzimi i paligjshëm dhe nxjerrja e gjuhës nga dikush për një shfrytëzim te paligjshëm atëherë e dini shume mirë se ka kundërveprim për këtë dhe nëse vazhdohet me disa situata te shantazheve atëherë shteti dhe kuvendi i komunës e ne këtë rast kuvendi i komunës është me i fort ndaj cilido që ka pretendime me vazhdua keq shfrytëzimin apo shfrytëzimin e paligjshëm te parcelave. Kështu që edhe për këta keq shfrytëzues shteti dhe ligji ka paraparë zgjidhje dhe unë po mendoj që sa nuk është zmadhua kjo gjë edhe me shume, ne një takim kur ka qenë KPF-ja atëherë ne fund te takimit kam thënë, pasi si kryetar i komunës e kam mandatin me vepruar me instrumente ligjore dhe ne zbatim dhe sundim te ligjit, pasi e kam pas shume vështir mirëpo kam vepru ne qytet te stacioni i autobusëve edhe përkundër faktit që ka pasur një histori me te përzierë. Në situatën ku është pronë e pastër komunale dhe ku ka shfrytëzim te paligjshëm te asaj prone ne emër te pretendimeve që dikush kërcënon atëherë ne jemi te obliguar me shpall me interes te përgjithshëm me vendim te kuvendit edhe menjëherë me shkua me veprime intensive sistematike te inspektoreve dhe policisë dhe nëse dikush pa te drejtë pretendon me i rezistua shtetit te vet, pasi e kam thënë edhe atë dit se fshati Krushe e Madhe ka dhënë shume me fshatra përreth e krejt komuna jonë. Por ne emër te kësaj askujt nuk i lejohet qe më pretendu që pa ligjshmëri me shfrytëzua parcelat te cilat janë te komunës se Rahovecit dhe ne momentin kur ne e marrim vendimin dhe nëse pretendohet që me vazhdu me shtyrje atëherë le ta dinë edhe mediat këtu nga kuvendi i komunës ka me vazhdu aksioni për largimin e shfrytëzuesve te paligjshëm pasi prona është komunale. Kështu që kushdo qoftë unë jam për zbatim te ligjit edhe e dua këtë vend siç e doni edhe ju. Me pretendu dikush me hije ne prone te komunës edhe me shfrytëzua paligjshëm edhe me ngrit zërin për diçka që vepron kundër ligjit pasi e dine shume mire që nuk kam asnjë hile ndaj askujt dhe e dine saktë se jam për me mbrojte pronën e komunës dhe po du me i dhanë kuvendit te komunës bashke me komunës që me zhvillua bizneset si agrokultura ferma e plot sene tjera që janë ne krushe siç janë edhe ne komunën e Rahovecit. Dhe një hapësirë që e ke ne dispozicion për disa parcela siç e kemi materialin e gatshëm dhe gjithashtu edhe te plotë për shkak se ka edhe historiat dhe gjithashtu e ke edhe verdiktin e gjykatëse që s'ka asnjë lloj përzierje apo kontesti atëherë pse duhet me u vonua me u votu.

Sejfullah Sejfullahu – Tash po i bien që nëse na nuk e votojmë atëherë duhet me veprime tjera që me vepru. Mirëpo ne anën tjetër ata po besojnë në atë që ju ke thonë që nëse kalon kjo pikë, atëherë ata nuk do të ngucën rreth kësaj çështje. Kështu që për mos i dëmtua ata, ne duhet me votu pro kësaj, pra unë jam i interesuar që edhe pse janë shfrytëzues ilegal ashtu siç thoni ju, atëherë mendoj se duhet me votu për këtë. E kam thënë edhe me herët se ky është vetëm qëndrimi im dhe nuk duhet te lidhet askush me qëndrimin tim, e po ashtu janë edhe shefat e grupeve parlamentare dhe këto gjera duhet te kryhen me shefat e grupeve parlamentare.

Kryetari – mendoj se nuk e qes ne lajthitje kuvendin e komunës dhe nuk është dëshirë e vullnet e as përcaktim e as vizion. Pasi unë nuk bëj kompromis me ligjin pasi ligji neve na obligon që operatorët e paligjshëm me i largua nga veprimtaria po a me i detyrua e me i bo te ligjshëm me ndihmën e kuvendit te komunës. Kjo gjë nuk bëhet menjëherë pasi ka procedura,. Kështu që unë nuk bëj kompromise dhe nuk do te ishte mirë me bo asnjëherë por ne po themi që te tre parcelat propozohen me kalu ne rend dite dhe mu votu, pra me u mbrojte prona me vendim te kuvendit te komunës. Kështu që cilat veprime do te ndodhin ne te ardhmen mirëpo sikur dikush me teprua atëherë behet shume zhurmë rreth kësaj dhe ne jemi te detyruar me veprue edhe me mekanizma te inspektimit dhe me polici dhe me i largu si shfrytëzues te paligjshëm pasi që kemi dokumentacion që nuk dëshirojmë me keqpërdor sot.

Kryesuesi – Faleminderit kryetar, para se me kalua te votimi, e kemi edhe një propozim prej zyrës ligjore që është një vendim i marr ne seancën e kaluar ë e ka kthye ministria e mjedisit dhe planifikimit hapësinor dhe infrastrukturës që është fjala për vendimin për formimin e komisionit për emërtimin dhe riemërtimin e rrugëve rrugicave parqeve e shesheve dhe lagjeve ne komunën e Rahovecit i miratuar nga kuvendi komunal, kështu që për sqarim e ftojme zyrtarin ligjor para se me vendos ne votim.

Isak Hoti - Faleminderit kryesues, përshëndetje për te gjithë. Sot përmes postes elektronike dhe jo përmes emailit, i cili është shtyp me datë 27.05.2022 dhe sot ka mbërri te ne, kështu që na kanë kthye vendimin për formimin e komisionit për emërtimin dhe riemërtimin e rrugëve dhe rrugicave parqeve shesheve lagjeve urbane ne komunën e Rahovecit. Arsytimi për mua është banal i pa analizuar mirë sepse thotë se dispozitat e ligjit Nr.04 L 071 për sistemin e adresave dhe akteve nënligjore nuk përfshin formimin e komisionit për emërtimin dhe riemërtimin e rrugëve rrugicave parqeve shesheve dhe lagjeve urbane. Kështu që për neve kushtetute është ligji për vetëqeverisje lokale që neni 17 te kompetencat vetanake te shkronja O kush e ka ligjin përpara thotë emërtimi i rrugëve rrugicave dhe vendeve tjera publike. Pra te kompetencat vetanake thotë komunat kanë kompetenca te plota dhe ekzekutive sa i përket interesit lokal duke respektuar standardet e përcaktuar ne legjislacionin e zbatueshëm ne fuqi sipas këtij ligji. Kështu që tash do te ishte mirë me shtie ne plotësim ndryshim dhe me ju tregu atyre që nuk është vetëm një ligj që rregullon një çështje por janë dispozita tjera që përfshihen ne ligje tjera.

Burim Krasniqi – MAPL-ja si monitoruese e jona ka thënë vendimi është ne rregull ne kuptimin procedural. Atëherë ministria e mjedisit është thirrur ne kompetenca, a do te ishte me e udhës me kthye një përgjigje me argumente si zyre ligjore e Komunës dhe me i dhanë hapësirë nëse ata nuk pajtohen me argumentin tone, atëherë neve na mbetet vetëm me shfuqizua vendimin tone. Pra mos me nguc vendimin që mos me shtie ne seancë dhe me kthye një përgjigje apo me ja dhanë një argument përgjigje ministrisë se ambientit dhe me shkua tutje.

Isak Hoti – Faktikisht këta e kanë kapur vetëm te ligji i adresave dhe ligji i adresave nuk e përcakton emërimin e rrugëve dhe ata nuk e kanë te qartë. Kështu që nëse e shohim ligjin pak me poshtë i kanë edhe kufijtë, kështu ne kemi te drejtë me i ndërrua edhe kufijtë nëse i përcjellim dispozitat e ligjit p.sh. dëshirojmë me bashku me një komunë tjetër dhe me bo bashke një komunë d.m.th. ligji na ka lejuar ehe sa i takon kësaj pjese. Mirëpo ne vetëm e fusim si tekst plotësimi dhe ndryshimi i vendimit me kaq numër dhe me pastaj fillojmë. Pasi që nëse vonohemi pas afatit ligjor nuk dua me hije ne vargun e shume vendimeve që janë neper gjykata sepse është shume e panevojshme. Kështu që ne ashtu kështu kemi me komunikua me ata dhe nëse

është nevoja do të shkoj personalisht te departamenti ligjor në ministri të planifikimit hapësinor për me pae me tutje.

Kryesuesi –Faleminderit Isak, që sa e mora vesh unë kuvendi komunal duhet me marr një vendim këtij ndryshim plotësimi të këtij vendimi. Atëherë kemi tre pika shtesë krahas këtij rendi të ditës, ku ne pikën e parë te propozuar nga grupi i aleancës për projekt vendimin për caktimin e lokacionit për hapësirë për biznese, po ashtu edhe ne pikën e dytë e kemi te propozuar nga grupi i aleancës për projekt vendimin për shpalljen me interes të përgjithshëm publik parcelën Nr.02756-0 në zonën kadastrale në Krushe e Madhe dhe po ashtu e kemi edhe vendimin për formimin e komisionit për emërtimin dhe ri emërtimin e rrugëve rrugicave parqeve shesheve dhe lagjeve urbane. Atëherë po i vendosim menjëherë në votim 3 propozimet, 2 prej Arbër Zenunit në emër të Aleancës, projektvendimin për caktimin e lokacionit për hapësirë për biznese dhe projektvendimin për shpalljen në interes të përgjithshëm publik të parcelës në fjalë në zonën kadastrale Krushë e Madhe, poashtu edhe plotësim ndryshimin e vendimit për formimin e komisionit për emërtimin dhe riemërtimin e rrugëve, rrugicave, parqeve, shesheve, lagjeve në komunën e Rahovecit të miratuar në seancën e kaluar nga kuvendi komunal. Kush është për?...Atëherë me shumicë votash këto 3 pika shtesë të rendit të ditës i bashkohen rendit të ditës për seancën e sotme ku gjithsej janë 13 pika. Vazhdojmë me miratimin e rendit të ditës si tërësi, kush është për?... Me votë unanime aprovohet edhe rendi i ditës për seancën e sotme. Vazhdojmë me pikën e parë të rendit të ditës; shqyrtimi dhe miratimi i procesverbalit nga seanca e kaluar.

Burim Krasniqi – Faleminderit kryesues, përshëndetje për krytarin, ekzekutivin dhe të gjithë të pranishmit. Te procesverbali nuk kam ndonjë vërejtje të veçantë, por, besoj që duhet të përfshihet komplet rrjedhën e séances dhe pa keqkuptime të diskutimi i kryetarit e kanë moderuar goxha shumë fjalimin e kryetarit në procesverbal, ajo që thuhet nga secili duhet të jetë dhe të mbetet, kërkoj që edhe një here të degjohet inçitimi i seancës së kaluar dhe të plotësohet procesverbali si duhet.

Kryesuesi – Faleminderit Burim, atëherë propozimin e Burimit për miratimin e procesverbalit nga mbledhja e kaluar po e vendosim në votim, kush është për që procesverbali të plotësohet dhe të bëhet gati për seancën tjetër?!...Atëherë me shumicë unanime procesverbali do të shqyrtohet dhe do të plotësohet edhe një herë, besoj që do të kemi mirëkuptimin e sekretarisë së kuvendit. Vazhdojmë me pikën e dytë të rendit të ditës; pyetje dhe përgjigjet në pyetjet e kuvendarëve, ndonjë çështje për të ngritur prej anëtarëve të kuvendit?

Burim Krasniqi – Faleminderit edhe një herë. Kam faktikisht 3 pyetje si Burim dhe si grup i asamblistëve të LDK-së. E para, te rruga Xërxë - Rahovec katër shiritore, e shikova ligjin për buxhet dhe pashë që ka buxhet prej 1 milion euro për këtë vit, por nuk po shoh ndonjë aktivitet, pse nuk po ndodh aktiviteti? Pastaj për drejtorin e financave, kontrata thotë që është 2019-2024, 5 vite parashihet me buxhet, a jemi në rregull me ligjin e prokurimit? A mundet me qenë 5 vite zbatimi i një kontrate për një projekt të caktuar? Për drejtorin e kulturës rinisë dhe sportit, te çështje investimit te epopeja e UÇK-së, a është zonë rekreacioni, fushë futbollit, stadion? Për drejtorin e Urbanizmit e kam një pyetje dhe shpresoj që seancën e radhës ta kem një përgjigje, objektet kolektive a duhet të kenë pranim teknik? Në këtë rast për shkollat; kemi në funksion shkollën e Hoçës Vogël, Fortesës, së shpejti shkolla e Krushës së Madhe dhe objektet tjera, a duhet të kenë pranim teknik dhe a duhet të kenë leje për shfrytëzim? Sepse sa i përket lejes për shfrytëzim përpos kushteve teknike që iu kanë përmbajtur projektit, janë edhe disa kritere tjera, në rast zjarri, në rast fatkeqësie të shkallës emergjente. Pra, a duhet të kenë pranim teknik dhe e dyta a duhet të keni leje për shfrytëzim prej komisioneve profesionale.

Bejtullah Deliu – Faleminderit kryesues, desha të ndërlihem te përgjigjet nga drejtori i bujqësisë gjegjësisht drejtoresha e shëndetësisë. Rreth pjesës së tregun qe e kanë parashtruar pyetjen se pse në kohë pandemie është ndërmarr, është një përgjigje goxha e detajuar, por si nën përgjigje dhe në atë që kërkova është dashur të ceket që ka qenë një farë infuzioni për përdorimin e atyre pjesëve për treg, sot thahen dhe janë të demoluar dhe askush nuk jep përgjegjësi për atë pjesë, pasi është investuar është “gjynah” mos të shfrytëzohen. E dyta, unë nuk e kam cekuar asnjë emër te pyetja për drejtoreshën e shëndetësisë, por këtu ajo e paska cekur që; z.Halil Çanta i cili ishte i punësuar në QKMF, i është ndërprerë kontrata neni 67, paragrafi 1 pika 1.3 dhe asgjë më

tepër. Unë konkretisht kërkoja se a është në rregull që t'i ndërprehet aq më shumë një doktori që ka qenë shërbyes i qytetarëve aty dhe t'i ndërprehet kontrata pa paralajmërim së paku një muaj më herët do të ishte më njerëzore. Mora përgjigje që është ndërpre kontrata, por kërkoja se a është dashur së paku një muaj më herët të informohet, pa marr parasysh se kujt i ndërprehet kontrata, t'i ndërprehet së paku me një paralajmërim e jo në mënyrë ad hoc prej sot ose prej nesër më nuk je në punë!... Është jo etike dhe jo e moralshme një gjë e tillë sidomos për doktorët që kanë dhënë shumë në kohë pandemie.

Leonard Morina – Përshëndetje kryesues, përshëndetje kryetar, drejtorë, kolegë asamblistë, media. Unë do të ndërlidhem me pyetjen që ia kam bërë drejtorit të arsimit, pyetja ka qenë; Si po i kaloni mësimdhënësit me kontrata të përkohshme në kontrata të rregjlla, pa konkurse? D.m.th kjo pyetje nuk ka marrë përgjigje. Përgjigjet e juaja nuk po them 90%, por 100% janë të pasakta në email. Shkollat e përmendura ia kanë pa hajrin, mbas një jave keni dërguar mësimdhënës, në shkollën e Drenocit që është paralelja e ndarë në Senoc, në Malësi, në Polluzhë e gjithkrah, të ka bërë mirë ty dhe nxënësve dhe i bie që e keni përmirësuar sjelljen në arsim. Këto pika të cekura në email janë përgjigje qyqare sepse nuk kanë asnjë argument janë fraza të thata. Unë për dallim nga ti, do t'i argumentoj të gjitha gjërat e cekura. Në pikën e tretë keni thënë që në shkollën “12 maji” në Ratkoc, mësimdhënësit janë profesional, unë këtu e kam një fletë të ditarit ku shihet që mësimdhënësi që mbanë fizikë (i ka orët e shënuara) e është me teknologji, ky është dokument zyrtarë mundet edhe inspektorati të vazhdoj të vërtetoj të saktën. Pika 4, keni thënë se janë të pavërteta prapë, nuk është profil përkatës mësimdhënësi Leonard Morina e kemi marrë si zëvendësim me kontratë të përkohshme, sipas udhëzimit administrativ unë jam bachelor i programit matematikë-informatikë me 240 kredi dhe jam i profilizuar për mësimdhënës i matematikës në fillore, nëse ju keni ndonjë udhëzim administrativ tjetër, mundeni të më demantoni. Sa i përket kontratës time që është e përkohshme që i keni vendosur disa numra aty, për mua nuk janë fare të rëndësishme, nuk e keni gjetur njeriun që e frikëson me data, datat dhe kontratën m'a përcakton ligji, jo Avni Morina. Pika 5, artikulet e Leonardit janë të pasakta, ja faktet, listat e kandidatëve që janë punësuar që i kemi marrë prej faqes së komunës, kandidatët që nuk janë në listë të testit me shkrim, ku janë në listë që janë në test me gojë? Inspektorati edhe këtu ka punë, mundet me u marr me këto fakte. Njëjtë, mësimdhënësi i teknologjisë (këtu janë fletët e ditarit) të datës 14.10.2021 që mbanë matematikë në Malësi të vogël dhe më 26.05.2022 që ende mbanë matematikë në Malësi të vogël, nëse këto janë të pavërteta atëherë shikoni ditarët se kush po i mbanë orët. Në pikën 6 Avni Morina bënë një gënjeshtër tjetër, aludon se isha nxënës i tij, asnjëherë Avni Morina nuk më ka dhënë mësim mua, përndryshe ndoshta nuk do të isha këtu ku jam. Në fund thotë që njerëzit si unë meritojnë respekt, si mund të kem respekt për një drejtor i cili prej 2 faqe të emailit asnjëherë nuk e shkruan saktë. Për njerëz që gënjejnë nuk mund të kem respekt drejtor. Faleminderit.

Kryetari – Përshëndetje, ndoshta do të ishte më mirë ti presim me shkrim përgjigjet nga pyetjet nga mbledhja e kaluar, sidoqoftë e ndjeva si obligim moral dhe për respekt t'i përgjigjem Burimit në 2-3 çështjet që i ngriti; E para rruga 4 krosi, financohet nga ministria planifikimit hapësinor infrastrukturës (po ia ndërrojnë emrat vazhdimisht) edhe sivjet ka buxhet, por besoj që ndoshta është e rastit dhe besoj që jeni në dijeni të gjithë që kemi një rritje enorme të çmimeve dhe njëkohësisht kemi një shpërpushje të madhe me kontratat që janë lidhur më herët. Edhe në çoftë se qeveria e republikës së Shqipërisë i ka dhënë zgjidhje kësaj situate pas rritjes së çmimeve me kontratat të cilat janë nënshkruar para rritjes së çmimeve edhe qeveria e Maqedonisë së Veriut, operatorët ekonomik edhe të komunës tonë edhe të republikës së Kosovës janë në pritje të një sinjali që e ka dhënë qeveria e Kosovës për subvencionimin ose mbulimin e humbjeve në masë diku 25- 30% se si është kërkuar, duke marrë shembull në 2-3 shtete të rajonit, kështu kanë vepruar, prandaj aktivitetet në terren janë ndërprerë nga shumë operatorë. Poashtu edhe ne jemi në pritje duke provuar t'i rikthejmë në punishte, se në fund të fundit ne e kemi për obligim zbatimin e kontratave sipas ligjit, por kemi vështirësi serioze në nivel lokal dhe në nivel qendror për t'i kthyer në punishte operatorët që kanë nënshkruar kontrata më herët. Shpresojmë për një epilog pozitiv nga një vendim potencial prej qeverisë ose ia propozon kuvendit të

republikës së Kosovës që përmes bankës qendrore (Burim, po e kupton çka po flas). Te epopeja e UÇK-së mbi qytet, e di që i kam hy pak në hak Biondinës dhe Afrim Dinës po ndoshta edhe Hasanit. Bëhet fjalë për një terren sportiv, kompleks sportiv, jo për stadiumin, projekti kryesor për stadium unë e kam nënshkruar një memorandum me ish ministrin Kujtim Gashi (nënkryetar i komunës së Prizrenit) por nuk kemi lëvizje përpara, as për stadiumin e kategorisë së dytë në Rahovec që është te epopeja e UÇK-së as për palestrën sportive në Krushë të Madhe e as për stadiumin në Ratkoc. Pra, ka pas një procedurë të prokurimit, është ndërprerë, kodi ekziston- mjete për moment nuk ka për asnjërin prej këtyre 3 projekteve që financohen nga ministria e kulturës rinis dhe sporteve. Sa i përket objekteve publike, p.sh; ne para disa ditësh e kemi përfunduar shkollën fillore “Sadedin Hajda” financim drejtpërdrejtë nga ministria e administratës publike që është nisur nga koha e kryetarit Idriz Vehapi, është vonuar realizimi dhe pranimin teknik dhe realisht rolin vendimtar e ka departamenti i projekteve bashkë me ministrinë e arsimit dhe besoj që standardet që ata i kanë paraparë i kanë plotësuar. Ne i kemi vërejtjet tona, në cilësinë e vëzhguesit edhe te operatori edhe te departamenti i projekteve në kuadër të ministrisë. Pra, pranimin teknik ata e kanë marrë përsipër. Në komunë të Rahovecit ka rreth 5 vite që nuk bëhen pranimet teknike si nëpër disa komuna tjera të republikës së Kosovës, por merret në konsideratë stacioni i fundit dhe garancia (ne i kemi dy vite, dikush më pak e dikush më shumë). Pra, zakonisht kur ministria financon, bënë pranime teknike. Bejtullah Deliu Po, unë po besoj që këtë javë shpallet faza e tretë dhe përfundimtare të kompletimit të tregut të rrushit në Rahovec. Ato objekte apo “tezga” vendet ku vendosen pemët dhe perimet do të riparohen sepse është nën garancinë të atij që e ka pas fazën e dytë. Faza e tretë nënkupton rrethojë dhe disa standarde që duhet t’i plotësoj një treg funksional i rrushit dhe besoj që me 2 shtator (kur mendohet të filloj Hardh Festi) po supozojmë ta përmbyllim edhe fazën e tretë dhe të aktivizimi bashkë me Hardh festin edhe tregu i madh i rrushit. Aty ani me një “pëlqim” operojnë edhe auto shkollat, kur ishte pandemia ne kemi pasur edhe kufizime gati edhe bllokada, meqenëse nuk lejohej tregu këtu brenda, ideja ka qenë shkak i hapësirës së madhe t’a dërgojmë një grup të caktuar të fermerëve dhe e dini që ndodhi ajo që ndodhi, nuk na lejuan as atje. Shkojmë te ndërprerja e kontratës të fizioterapeutit, situata është kjo; ligji neve na obligon të forcojmë mekanizmin që është kryekëput mjekësi familjare dhe ka ndodh një ankesë, fatkeqësisht më vije keq, këtij është dashur që çdo 6 muaj t’i vazhdohet kontrata, punë të madhe ka bërë fizioterapeuti Halil Çanta, sepse çdo kush ka nevojë për fizio terapi, vet bashkëshortja ime ka qenë, po ja që ligji na ka pamundësuar sepse kur është ngritur aktakuzë për këtë çështje ai është dashur të jep vet dorëheqje sepse ndoshta e kish ndihmuar procesin, jo që ka qenë dëshirë e jona, por prokuroria ka reaguar edhe është dashur të jep dorëheqje. Kur ka ardhë momenti kur atij u është dashur t’i vazhdohet kontrata, ai ka qenë në dijeni që nuk i vazhdohet edhe për 6 muaj tjera. Kjo nuk ka qenë dëshira jonë sepse ka nevojë QKMF-ja jonë për angazhime të këtij profesioni për arsye se ankesat e njerëzve në nevojë janë të mëdha. Përkundrazi unë e kam edhe mik Halilin por, e kemi kryer detyrën tonë sepse prokuroria ka thënë që dikujt iu ka ngritur aktakuzë për një gjë “pa lidhje hiç” por ata kanë vepruar në bazë të ligjit dhe ne është dashur t’ia ndërprejmë kontratën, në këtë rast mos t’ia vazhdojmë, e kemi pritë deri në ditën e fundit dhe ai ka qenë në dijeni që nuk i vazhdohet sepse 6 maji i fundit po afrohet dhe ka qenë me i sikletshëm për neve sepse tani ne nuk e kemi fizioterapeutin aty. Leonardit doja t’i them kështu, ky Gjergj Gojani kish dal në pension edhe kur të hapet ai vend është mirë të aplikoni, e dyta; zakonisht kur merr të dhëna zyrtare, duhet të kesh kërkesën për qasje në dokumente publike, a po kuton, është një shkelje... nuk dëshirojmë të qesim para gjyqit, por secili asamblistë dhe secili qytetarë e ka të drejtën të kërkoj qasje në dokumente publike, që të shkoje e t’a fotografoje një ditar atje, të skanosh diçka etj...Mos harro se je shef i grupit goxha të rëndësishëm politik dhe sundimi i ligjit është prioritet i qeverisë së republikës së Kosovës.

Leonard Morina – Faleminderit, te Gjergj Gojani po e lë Shqipe Kryeziun për aplikim. Sa i përket qasjes në dokumente zyrtare, këto i kam marrë prej web-faqes së komunës, që janë konkurset me emra të mësimdhënësve që kanë aplikuar. Këto fleta m’i kanë dhënë njerëzit që i kanë parë shkeljet dhe kanë dashur

t'a përmirësojnë shkeljen, më vështirë është të bëjmë shkelje se sa të tregojmë shkelje, kështu që unë kërkoja përgjigje për këto veprime, jo për letra.

Lirigzon Kastrati – Faleminderit kryesues, i nderuar ekzekutiv, anëtarë të kuvendit komunal. Unë e kam pranuar një përgjigje nga ana e drejtorit, për pyetjet e parashtruara, për projektin; rregullimi i shtretërve të lumenjëve të fshatrave Hoçë e Madhe, Brestoc, Hoçë e Vogël, Nagac dhe Krushë e Madhe. Drejtor, këtë projekt e zhvillon komuna e Rahovecit, neve na ke dërguar disa pasqyra, disa tabela, deri tani për këtë projekt janë investuar 270.000eu, e dimë edhe që është ndalur puna, por se di a i keni njoftuar operatorët ekonomik që gjatë punimeve shumë prona të fshatit Brestoc kanë mbetur të papunuara për shkak të mbeturinave që ata i kanë bërë gjatë punës së rregullimit të shtretërve të lumenjve. Pritet nënshkrimi i një aneks memorandum, kur do të nënshkruhet ky memorandum, çfarë hapi keni bërë ju, të na jepni përgjigje në këtë drejtim. Për investimet që janë bërë 270.000eu, prej informatave që kam ajo pjesë ka nisur prapë të dëmtohet, në Brestoc është bërë ky investim, pak në Hoçë, nuk e di ku tjetër janë investuar këto mjete, presim përgjigje. Faleminderit shumë.

Hasan Përboqi – Faleminderit kryesues, përshëndetje kryesues, nënkryetar, kolegë asamblistë, drejtorë të drejtorive dhe ju media të pranishme. Unë e kam një kërkesë që i drejtohet drejtorisë së inspektoratit, saktësisht drejtoreshës Nora Boshnjaku. Në lagjen e epërme, saktësisht në rrugën “Avdullah Bugari” në përfundim të kësaj rruge dhe ku fillon rruga “Mizair Isma” nëse e keni parasysh semaforat e rinjë ku janë (përpjetëza), te kthesa ku bashkohen këto dy rrugë, para 2 muajve është bërë një prerje e asfaltit prej KRU-Gjakovës, banorët e lagjes dhe unë iu kemi drejtuar KRU-Gjakovës me kërkesë, kemi biseduar në telefon duke i kërkuar të rregullohet sa më shpejtë ai problem që është aty sepse është një prerje shumë e thellë dhe është kthesë, në këtë rast shoferët nuk mund t'a vërejnë duke dëmtuar edhe veturat. Pasi KRU-Gjakova nuk dëshiron të marrë vesh gojarisht nga kjo kërkesë legjitime prej qytetarëve, atëherë të aktivizohet inspektorati për arsye që ky defekt ka mbi dy muaj dhe nuk besoj që është e tolerueshme. Një replikë për shefin e grupit të VV-së, por pasi që nuk qëndron në sallë, po e lë për mbledhjen tjetër.

Besë Bytyqi – Shumë faleminderit, pyetjet e shefave të grupeve si dhe të Hasanit e Lirigzonit dëshiroj t'i përmbylli me një urim për kryetarin e komunës, stafin politik si dhe stafin e nëpunësve civil për vendin e parë në grandin e performancës, kam menduar që edhe të tjerët do të urojnë dhe shfrytëzojnë rastin në emër të grupit të Aleancës t'iu uroj një shumë prej 1 milion e 100 e disa mijëra euro (nuk po e mbajë në mend mirë), e di që këto mjete do të shkojnë në të mirë të qytetarëve, i përgëzoj jashtëzakonisht për punën dhe uroj me qenë në toplistë shumë gjatë.

Burim Krasniqi – Besë, shefe e grupit të aleancës, mirë që e lavdërove kryetarin, por është dashur të falënderohet kolegët asamblistë të mandatit të kaluar sepse poenët më të mëdha të mundshme e ka marrë puna e asamblesë komunale, pozicionet tjerat kanë nga pak çalime, por duhet të falënderojmë Afrimin, kryesues që ka qenë edhe kolegët asamblistë për grantin dhe jo vetëm kryetarin e komunës.

Kryetari – Ka edhe tregues që kanë të bëjnë me performancën e kuvendit të komunës, janë evidencat, angazhimet dhe mbledhjet e kuvendit të komunës, veprimet që kthehen prej MAPL-së të gjitha këto, prandaj nëse ju kujtohet Burim se kur thoja “o njerëz mos t'i vonojmë gjërat se ministria mund të na ndëshkojë” prandaj meritat janë të qytetarëve të komunës së Rahovecit, të organeve të zgjedhura të komunës së Rahovecit, poashtu të ekipit tim dhe kemi synuar edhe më shumë, kemi pak problem sepse ende nuk e kemi PZHK-në, hartën zonale që po t'i kishim edhe këto ne me kilometra do të ishim më larg se tjerët, shpresojmë që sivjet do t'i arrijmë edhe këto dhe e shohim që në vitin 2022 do të dalim edhe më mirë. Më e rëndësishmja është që 1.148.890.77eu kjo si thonë gjakovarët këto janë “qyl” kemi mundur edhe hiç mos t'i marrim.

Sejfullah Sejfullahu - Faleminderit, kryetar a bën të qëndroni edhe një minutë, është shumë me rëndësi; prej meje i keni dy lajme, së pari e donë urimin apo kritikën?...Urime që je shpallur “qytetar nderi i Përmetit” edhe pse jemi opozitë ne gëzohemi dhe na vije mirë. Kritika është se të duhet bashkëpunimi, siç i the edhe Burimit

edhe mua, nuk është keq apo marre që edhe ndonjë prej opozitës t'a marrësh me veti edhe atje te zona e turizmit që keni qenë edhe në Përmet.

Kryetari – Vetëm me familjen time kam qenë, kemi pas qejfi t'i marrin shifat e grupeve, por bashkia e Përmetit financiarisht është më e dobët se sa komuna jonë, nuk kemi dashur ta ngarkojmë.

Kryesuesi – Në emër të kuvendit komunal, unë e uroj kryetarin, më saktësisht komunën e Rahovecit me grupin punues për grantin e performancës. Meritat i takojnë shërbyesve civil por edhe kryetarit për vendin e parë për performancë, gjithmonë i përshëndesim gjërat e mira si kjo. Më lejoni që si kryesues t'ia uroj ditëlindjen anëtarit të kuvendit Alban Bajraktarit, vazhdojmë një pauzë një orësh, deri 13:15 ju lus të ktheheni në kohë.

Kryesuesi – Përshëndetje edhe një herë për të gjithë, i nderuari kryetar, nënkryetar, anëtarë të kuvendit komunal, drejtorë të drejtorive, po e vazhdojmë seancën pas pauzës, kemi mbetur te pika e dytë që është e papërfunduar, nëse ka ndonjëri ndonjë pyetje për ekzekutivin?

Ilir Pallqa – Faleminderit kryesues, të nderuar të gjithë të pranishëm, po flas edhe unë diçka kësaj radhe pak për përmbajtje, më shumë për formë. Desha të bëjë një kërkesë për parkingun te palestra, e di që është në kuadër të projektit të sheshit, nëse nuk jam gabim, po meqenëse sheshi po na del një serial i gjatë, a ekziston ndonjë mundësi të rregullohet të paktën pjesa e epërme e parkingut, momentalisht aty veturat parkohen veç prej “zorit”, e nëse vazhdon të mbetet kështu, atëherë tërësisht parkingu do të bëhet i papërdorshëm. Pastaj për nga forma është e llojit të vet. Në mes të qytetit çoftë edhe një muaj të mbetet në atë gjendje ai parking është tmerr, fatkeqësisht ka vite që është ashtu kryetar! Ai është një prej vendeve që frekuentohet më së shumti në komunën tonë, prej banorëve jashtë komunës sonë, fal palestrës. Çfarë përshtypje i japim ne vizitorëve në mes të qytetit? Për fund po e bëjë një propozim, Rumir, drejtor dhe kryetar, nëse nuk janë mundësitë të rregullohet vetëm ajo pjesë, a ekziston mundësia që ndërtimi i sheshit të filloj pikërisht prej asaj pjese? e kur të sigurohen fondet të vazhdoj pjesa tjetër, që mos të mbetet në atë gjendje.

Kryetari – Po Ilir, e kuptova. Realisht aty nuk është parking, po thjesht improvizim, aty ka qenë tepër më keq për shkak të ekoregjionit me pajisjet e veta. Në çoftëse do të kemi mundësi të lidhim kontratë për shesh, atëherë po mund të niset prej aty dhe të rregullohet infrastruktura sipas projektit. Parkingjet ende i kemi jo të menaxhueshme, sepse ndoshta duhet kuvendi i komunës të shqyrtojë mundësinë që në një nga pikat e rendit të ditës të bëjë dhënien në shfrytëzim të parkingjeve të cilat tani janë falas, por me një menaxhim më të përgjegjshëm të shpallim ankandin në bazë të investimeve se kush e ka ofertën më të mirë t'i bëjmë parkingjet me standarde tjera. Në rrugën “Ibrahim Rugova” do të shtohet një parking i ri tash me rrugën një kahëshe, vetëm jemi duke pritur lidhjen e kontratës. Jam dakord me atë që është shqetësim sepse parkingu aty është pa standard, kush e zë vendim më herët e as nuk është e rregulluar mënyra e parkingut kështu që në zbatim të kontratës potenciale për shesh, fillojmë aty. Tani e gjashtë muaj jemi në pritje të rishpalljes së procedurave të prokurimit për shesh qendror.

Kryesuesi – Faleminderit kryetar, nëse nuk ka askush ndonjë diskutim, atëherë po vazhdojmë me pikën e tretë të rendit të ditës: Shqyrtimi dhe miratimi i vendimit për bartjen rezervë në investime kapitale, ndonjë çështje prej anëtarëve të kuvendit sa i përket kësaj pike? Drejtori Afrim Limani e ka fjalën për prezantimin e kësaj pike.

Afrim Limani – I nderuar kryesues, kryetar, nënkryetar, asamblistë dhe gjithë të pranishmit. Bartja e rezervave d.m.th nga viti 2022. Për shumicën nga ju që jeni legjislaturë e re, besoj që nuk e dini çka është “rezerva”. Atëherë rezervat janë pjesë e investimeve kapitale të cilat nuk e kanë kaluar udhëzimin administrativ 04/2019 dhe me aprovimin e departamentit të buxhetit në ministrinë e financave këto janë projekte rezervë në kuadër të komunës së Rahovecit. I kemi gjithsej 10 projekte dhe shuma për këto projekte në total është 690.000eu nga granti janë 550.000eu ndërsa nga të hyrat vetanake 185.000eu. Edhe një informatë, ky është viti i dytë që ka filluar aplikimi i këtij udhëzimi administrativ dhe të gjitha këto projekte kapitale d.m.th në vitin 2020 kanë kaluar nëpër këto filtra dhe kanë kaluar, ndërsa për çudi tani në vitin 2022 iu kanë nënshtruar këtyre filtrave por nuk kanë kaluar. Pa marr parasysh se si është krijuar situata, drejtorja për

financa dhe buxhet pas një analize të thellë të këtyre projekteve kemi bërë edhe bartjen e këtyre projekteve duke analizuar gjendjen e investimeve kapitale, informatë tjetër është se me të gjitha projektet ne kemi kontrata të lidhura duke përfshirë këtu obligimet financiare, atëherë qëllimi edhe ideja është që bartja e këtyre të bëhet përafërsisht në mënyrë analoge në kuadër të projekteve që e keni materialin para jush, për fund, shuma për 550.000eu që është pjesë e grantit, nëse nuk votohet atëherë kjo shumë rrezikohet të kalojë në suficit.

Burim Krasniqi – Faleminderit kryesues. Drejtor, në bashkëbisedimin që e kemi pasur është thënë që arsyeja kryesore e bartjes së mjeteve rezervë është për shkak të keq kualifikimit që ka ndodhur gjatë draftimit të buxhetit. Te departamenti i bujqësisë te kodi 40827 që është participim në projekte në bashkëfinancim në bujqësi, në ligjin për buxhet janë 50.000 prej grantit qeveritarë dhe 30.000 janë prej të hyrave vetanake që aktualisht janë 80.000 komplet të parapara. Po kërkohet të barten edhe 300.000 të tjera në të njëjtin projekt, e të cilat defakto janë të njëjtat projekte që janë te bartja e mjeteve rezervë, pra do të ketë përkrahje të fermerëve të mekanizmave bujqësor, ndërtim të serave, stallave etj.. d.m.th të njëjtat veprime do të ndodhin, por përmes kodit buxhetor në participim me projekte në bashkëfinancim në bujqësi. Unë në E-Prokurim e pashë që komuna e Rahovecit ka nënshkruar një kontratë prej 850.850eu për mekanizma bujqësorë për fermer, pyetja është: A mund të ndodh që prapë të jetë bashkëfinancim në mekanizma bujqësorë siç është kodi 466674, 47832, 47865 që janë prapë: mekanizma bujqësorë, stalla, miniferma, por vetëm që po bëhen prej një kodi tjetër dhe veprimi që ndodh gjatë pagesave po del të jetë që nuk është investim kapital por është mallra dhe shërbime. D.m.th titulli është investim kapital i pranuar prej ministrisë së financave i kodit për participim në mjete në bashkëfinancim në bujqësi por veprimi që ndodh kur paguhet mjetet e mekanizmit bujqësor është subvencion, nuk është investim kapital, kjo i bie që është titulluar ndryshe që parimisht është e njëjta gjë. Meqë jemi te bartja e mjeteve, si shqetësim e kam: kjo shifër 850.850 a do të na bie prapë në këtë situatë të ngjashme, sepse diku mbesin edhe 520.000 tjera për vitin 2023-24 e tutje, sepse në ligjin për buxhetin nuk e kam parë që janë 850.000eu të alokuara për mekanizma bujqësorë.

Leonard Morina – Faleminderit kryesues, ne si grup i lëvizjes vetëvendosje propozojmë që nga bartja e mjeteve rezervë të ndahen 30.000eu për subvencionimin e sporteve, përkatësisht grup moshave të reja dhe 30.000eu të ndahen në kodin 48208 për furnizimin e shkollave me teknologji informative, mos të harrojmë që në komunën tonë nuk ka vetëm bujq, por ka edhe nxënës që kanë nevojë për mjete për konkretizim dhe sportist të ri që kanë nevojë për subvencionim.

Lirigzon Kastrati – Faleminderit kryesues, në emër të grupit të asamblistëve të LDK-së, sa i përket kësaj pike të rendit të ditës për bartjen e mjeteve vetanake, propozojmë që këto mjete të ndahen në dy kategori: në shërbime publike (ndërtimi dhe zgjerimi i ndriçimit publik në komunën e Rahovecit) propozimi për ndarje është 100.000eu dhe në zhvillimin ekonomik, kodi i projektit 45690 investim në zonën ekonomike në Optrushë, propozimi për bartje këtu është 140.000eu. Kërkojmë nga kryesuesi që këtë propozim t'a vendosë në votim.

Bejtullah Deliu – Përshëndetje kryesues, konsiderojmë që bartja e mjeteve të shfrytëzohet në sektorin e bujqësisë me kod ekzistues 421 që është funksional, me bartjen e mjeteve që e bëmë të shkojnë për një ndërtim të një depoje bujqësore me Komore ftohëse me rreth 150.000-200.000eu për këtë objekt.

Besë Bytyqi – Faleminderit kryesues, grupi i AAK-së e përkrah propozimin e kryetarit me të gjitha këto kode buxhetore si dhe me nën programet, kodet, përshkrimin e tyre, kështu që ne jemi PRO këtij propozimi të kryetarit.

Afrim Limani – Burim, faleminderit për pyetjen! Këto projekte iu kanë nënshtruar udhëzimin administrativ 04-2019 dhe kanë kaluar në rezerva. Këtu është edhe keq klasifikimi d.m.th një numër i madh i projekteve janë si rezultat i keq klasifikimit dhe si rezultat i emërimit të gabuar. Për të marrë karakterin e një projekti kapital të paktën në përshkrim duhet të figuroj si ndërtim dhe ky kishte me qenë gabimi dhe për këtë arsye ka ndodh kjo. Nuk po hyjë më në detale, sepse e keni nëpër emaila, kush ka qenë i interesuar e ka lexuar. Pyetja

tjetër ishte nëse do të përsëritet situata e njëjtë në projektin participimi në bashkëfinancim në bujqësi kodit 40-827, fatbardhësisht ky projekt nuk është në pjesën rezervë, ligji na lejon që këto mjete t'i bartim në kuadër të këtij projekti me kusht që t'i paguajmë faturat dhe obligimet financiare që i kemi deri më tani. Në kuadër të këtyre projekteve kemi edhe kontrata edhe obligime financiare dhe ne detyrimisht në mënyrë analoge në kuadër të projekteve t'i bartim mjetet në mënyrë t'i kryejmë obligimet ndaj operatorëve që i kemi. Ju siguroj dhe ju garantoj që këto procese do të kryhen, pa ndonjë problem. Sipas ligjit këto rezerva kryesisht janë projekte kapitale dhe gjithashtu bartja duhet të jetë në projekte kapitale në këtë rast në subvencione nuk mundemi. Propozimin që e dha Leonardi dhe Lirigzoni, kisha kërkuar mirëkuptimin tuaj sepse kemi kontrata në kuadër të këtyre projekteve si dhe obligime financiare dhe mund të na prishet situata totalisht. Në këtë pikë kërkoj mirëkuptimin e juaj.

Kryetari – Unë e mirëkuptova Burimin, nuk është çudi që vitin e ardhshëm të kemi përsëri situata të reja ligjore dhe ta akceptojmë si keq klasifikim, pra asnjëherë nuk mund të jemi të sigurt, por tani jemi në përshtatje të situatës sepse kemi bërë konsultime edhe me departamentin e buxhetit, Burim dhe nuk është çudi që auditorët ose qeveria nesër të fusin në zbatim një udhëzim të ri me plotësim-ndryshime dhe kjo që po bëjmë sot në të ardhmen të konsiderohet keq klasifikim. E mirëkuptova edhe Lirigzonin, dëgjo Lirigzon, ne 80.000eu i kemi prej grantit që e kemi fituar për ndriçim publik dhe jemi në përmbyllje të kontratës, ndërsa për depon bujqësore kemi ndarë një grant mbi 80.000eu vetëm për komora dhe depo, plus këto që i kemi bërë me bartje dhe mendoj që kalkulimi i drejtorit të financave është bukur i analizuar me kujdes, edhe subvencionet mund të rriten por jo në këtë fazë. Në seancën e kaluar drejtori i financave ka thënë që për vitin 2023 kemi mundësi që subvencionet t'i rrisim deri në 800.000eu kjo e gjitha për shkak të ikjes së keq klasifikimeve, ndërsa sivjet i kemi 361.000eu për të gjitha kategoritë e subvencioneve dhe transferove. Ne kemi obligime financiare, ky fond i rezervës duhet të destinohet për investime kapitale. E shihni një shumë të madhe aty në bujqësi d.m.th kemi kontratë 850.000eu dhe për shkak të mosfunksionimit të OSHP-së vonesat kanë qenë enorme dhe ne me 26-27 mars të këtij viti e kemi nënshkruar kontratën sepse kanë përfunduar të gjitha procedurat, janë 6 lote, 2 lote i ka një kompani e Rahovecit dhe kemi obligim ndaj përfutuesve dhe jemi në një situatë ku kontrata është nënshkruar dhe mekanizmat po vijnë dhe besoj që kjo shumë që është në kodin për bashkëfinancim duhet të përkrahet nga kuvendi në mënyrë që të shkojmë në një trend normal të zbatimit të pagesës financiare të kontratave. Financa rezervë tash është investim kapital, nuk është mallra dhe shërbime, ky fond nëpër kode dhe projekte kapitale, çdo interpretim tjetër është gabim sepse siç tha edhe Burimi rezerva është krijuar sepse ka ndodh keq kualifikimi, atëherë ne i kemi gjetur kodet si investime kapitale dhe ky është thelbi i shpjegimit dhe besoj që jam tepër i qartë.

Afrim Limani – Ilir, po të adresohem ty, a është neni 15 ligjit mbi financat publike dhe përgjegjësi? E kam lexuar ligjin-nenin dhe e di shumë mirë si dhe kam qenë edhe në konsultime me departamentin e buxhetit. Shumë e qartë është aty shkruan: përpos në pozicionin e pagave në kategori tjera mund të vendosim mjete, mirëpo në këtë rast komuna e Rahovecit të gjitha rezervat burimin e kanë nga investimet kapitale. Buxhetin në subvencione ne e kemi të planifikuar më 16 shtator të vitit të kaluar me tavane të njëjta dhe i ka limitet, ato mjete kanë ngelur aty, rezervat kanë rrjedhur prej investimeve kapitale dhe detyrohemi t'i vendosim në kuadër të investimeve kapitale. Ilir, sikur pjesa e subvencioneve të kishte kaluar në rezerva atëherë ne kishim mundur t'i bartim, por komuna jonë nuk e kemi atë situatë dhe burimi i krejt këtyre është që rezerva ka rrjedh nga investimet kapitale dhe detyrohemi me vendos në kuadër të investimeve kapitale.

Kryesuesi – Fillimisht i kemi tre propozime: në emër të grupit të LDK-së e kemi propozimin e Lirigzonit, propozimin e Leonardit dhe të Bejtullah Delit. Po i vendosim fillimisht propozimet në votim në çoftëse marrin mbështetje prej anëtarëve të kuvendit... Atëherë kërkoj prej anëtarëve të kuvendit që kanë propozuar të jenë më korrekt me propozime.

Leonard Morina – Propozoj që këto mjete të merren prej kodit 47011 bujqësi, pylltari dhe zhvillim rural.

Kryetari – Me mirëkuptim e kisha ftuar Leonardin dhe të gjithë propozuesit, që u sqarova pak a shumë me Lirigzonin. Dëgjoni, ne mund të kemi propozime por ky kod për bujqësi është shumë e madhe dhe mendoj që ka impakt te bujqit por edhe te operatori që fatbardhësisht është i komunës tonë. Propozimet e juaja, depon bujqësore dhe ndriçimin publik ne i kemi trajtuar në forma të tjera sepse kemi ndarë edhe grant. 850.000eu është kontrata e cila është nënshkruar sivjet dhe është nisur vitin e kaluar për shkak të mosfunksionimit të OSHP-së. Çdo propozim është legjitim, por iu kisha lutur që kësaj radhe të pajtohemi me orientimin që e kemi nga drejtoria e financave dhe shpjegimin nga drejtori i financave. Këto propozime që i keni sot, kryesisht janë kapitale dhe po flas në emër të drejtorit mirë është t'a votojmë sepse këtu nuk kemi të bëjmë me politikë. Bëhet fjalë për një operator të suksesshëm që është fat që është nga komuna e Rahovecit dhe ndoshta pajisjet janë gati dhe i pret obligimet të cilat kishte mundur t'i merr edhe më herët në rast të mos krijimit të fondit rezervë, por ja që është krijuar ky fond dhe po thotë prej subvencionit vendose në kapital, e kemi gjetur kodin për bashkëfinancim dhe patjetër që bujqësisë duhet t'i japim krahë. Po flasim konkretisht "Haxhijaha Trade" ose djemtë e Halim Haxhijahës janë të përfshirë në dy kontrata për këto pagesa, nuk e kam për media por për asamblenë komunale. Pas fillimi të zbatimi të këtij udhëzimi administrativ shumë komuna kanë krijuar fond rezervë, ndoshta Bali Muharremaj e ka edhe 1.000.000, ka komuna që nuk kanë fare, por shumica po, kanë pas keq klasifikim. Ju ftoj për ta votuar, mos t'i vonojmë më shumë në ekzekutimin e pagesave.

Rasim Fazliu – Faleminderit kryesues, kryetari e përmendi që kur kemi ardhë te miratimi i buxhetit ne si opozitë e kemi pas këtë shqetësim, duke thënë se shikoni se këto janë subvencione-mallra shërbime etj... dhe keni qenë këmbëngulës që nuk janë, më në fund janë kthyer dhe tani si të doni quani, por në fakt i bie që këto asnjëherë nuk kanë qenë investime kapitale. Desha ta bëjë një pyetje çoftë për kryetarin ose drejtorin; po e lexoj saktësisht; ndërtimi i serave me participim 150.000eu, përkrahja me mekanizëm bujqësorë 150.000eu, stalla dhe ferma të vogla 50.000eu e tash me këtë të rejën barten në kuadër të projekteve, përsëri po shkruan participimi me projekte në bashkëfinancim në bujqësi. Pata qejf për sqarim për çfarë projekte bëhet fjalë, nëse ka mundësi për elaborim, apo është i njëjti brumë. Pastaj desha të ndalem planifikimi urban, mjedis dhe inspektorati kod funksional 0620, desha të pyes; hartimi i projekteve të ndryshme ka qenë 90.000eu plus 60.000eu prej të hyrave vetanake d.m.th. 150.000eu, faktikisht këto projekte po mbesin pa financim, çka po ndodh me "hartimin e projekteve" ku i marrim ato mjete? Sepse është ndryshim i madh.

Afrim Limani – Mësues, faleminderit shumë për pyetjen. Të njëjtën përgjigje e dhashë edhe më herët për Burimin, por tash dëshiroj t'a elaborojë më shumë. Pse janë bartë këto mjete në kuadër të projektit "Participimi në projekte me bashkëfinancim në bujqësi"? Për mendimin tim edhe ky projekt është si projektet tjera dhe do të duhet të ishte në keq klasifikim, por fatbardhësisht nuk është dhe është aktiv, përderisa është kështu serat dhe projektin tjetër ne po e bartim në kuadër të këtij projekti me mundësi që kemi të drejtë ligjore të bëjmë pagesën për këta operatorë. Ndërsa në planifikimet e vitit të ardhshëm nuk rrezikoj kështu, e kam përgatitur planin të cilin në qershor do ta keni në kuvend për votim me subvencione të rritura në kuadër të kësaj vlere në mënyrë t'i ikim keq klasifikimit duke zvogëluar investimet kapitale dhe rritur subvencionet. Te hartimi i projekteve – mbikëqyrja e projekteve jemi detyruar t'i vendosim në kategorinë mallra dhe shërbime, në këtë rast ne mund të operojmë me dy letra në mallra dhe shërbime dhe duke respektuar udhëzimin 04/2019 sepse aty shkruan: hartimi dhe mbikëqyrja e projekteve duhet të futet në kuadër të hartimit të atij projekti psh; ndërtimi i rrugëve lokale, operatori ekonomik e ka bërë hartimin e atij projekti dhe vlera hyn në kuadër të atij projekti, kurse ne për ta kryer obligimin financiar ndaj operatorit në fjalë, jemi detyruar që këto mjete t'i bartim në; rregullimin e shtretërve dhe lumenjve në komunën e Rahovecit. Ju lus për mirëkuptim sepse kemi kontrata dhe obligime për të gjitha këto projekte.

Kryesuesi - Faleminderit drejtor, atëherë propozimi i Leonard Morinës në emër të grupit të lëvizjes është që; prej kodit 47011 - 30.000eu të ndahen për subvencionim të sportit dhe 30.000eu për financim të teknologjisë nëpër shkolla. Propozimin si të tillë e vendosim në votim, nëse ka mospërputhje me ligj, këto mjete nuk vendosen aty ku propozohen. Propozimin po e vendosi në votim, kush është PËR këtë propozim të grupit të

lëvizjes Vetëvendosje? Kundër? Absteim? Me 15 vota kundër dhe 13 vota për nuk kalon propozimi i Leonard Morinës. Ndërsa Lirigzon Kastrati ka propozuar që disa mjete të shkojnë për çështje si më poshtë; 100.000eu për zgjerimin e ndriçimit publik si dhe 140.000eu për zonën ekonomike në Optrushë. Nëse ka mundësi Lirigzoni të na tregoj se ku t'i marrim mjetet?

Kryetari – 80.000eu për ndriçim publik i kemi vendos që e kemi fituar grantin e performancës, kontrata është duke shkuar drejtë përfundimit, nuk është e logjikshme të bartim mjete për diçka që është në përfundim e sipër. Ndërsa për zonën ekonomike në Optrushë, po iu siguroj që nuk mund të zhvillohet asnjë aktivitet, sepse procedurat e prokurimit duhet t'i nisë ministria e tregtisë industrisë ndërmarrësisë, ne jemi vetëm bashkë financues me 20%. Për zonë industriale ose ekonomike qeveria inicon procedurat, mos të ngutemi sepse nuk guxojmë të bëjmë asnjë hap për atë zonë, përdërisa nuk na kanë dhënë dritën jeshile ministria e tregtisë industrisë dhe ndërmarrësisë dhe t'u kisha lutë t'i tërheqësh dy propozimet.

Lirigzon Kastrati – Përhëndetje kryesues, për mjetet e tërhequra ia lejmë në dorë drejtorisë së financave se ku dëshiron t'i merr këto mjete dhe kërkoj që propozimi të kaloj në votim!

Kryesuesi - Faleminderit Lirigzon, d.m.th 100.000eu janë kërkuar për zgjerimin e ndriçimit publik dhe 140.000eu për zonën ekonomike në Optrushë. Kush është PËR këtij propozimi? Kundër?... Abstenime nuk ka ... Kemi 15 vota kundër, 14 pro dhe propozimi i Lirigzon Kastratit nuk kalon. Propozimi i tretë Bejtullah Deliu ka propozuar që të shtohen 150.000-200.000eu për magazinimin e pemëve dhe perimeve në projektin e Komoreve ftohëse.

Bejtullah Deliu – Faleminderit kryesues, vetëm po propozoj që këto mjete munden të tërhiqen nga dy kode 66360 (planifikim urban dhe mjedis) dhe 40839 (hartimi i projekteve të ndryshme), por nëse kjo mund të interferoj keq në hartimin apo funksionimin e mirëfilltë të buxhetit mundemi edhe t'ia lejojmë në dorë drejtorisë së financave, por në këto dy kode është mirë të tërhiqen dhe është kërkesë eksplicite e imja.

Kryetari – Kodi është formuar, projekti është iniciuar, kuvendi i komunës ka vendos për një pjesë të mjeteve gjithashtu kryetari i komunës një pjesë të grantit e ka vendos për këtë depo mundem edhe të iu dokumentoj, por përdërisa nuk e kemi ende projektin kryesor, sepse ka afat kohorë dhe ende nuk ia kemi nisur procedurës mendoj që 160.000eu janë aty kurdo që lidhet kontrata. Ne jemi duke shkuar kah fundi i vitit Bejtullah, imagjino ende nuk është bërë projekti kryesor e as procedura e prokurimit e me 160.000 për punë sivjet është tepër mirë. Në planin e buxhetit për vitin e ardhshëm ne i shtojmë mjetet dhe të kisha lutur të tërhiqesh sepse në depon për bujqësi do të jemi shumë mirë me financa edhe për këtë vit, prandaj kërkoj mirëkuptim sepse kodi dhe projekti ekzistojnë.

Kryesuesi – Faleminderit kryetar. Bejtullah, propozimi qëndron ende?

Bejtullah Deliu – Shkojmë me votim, pasi u rrëzuan këta të tjerët, le të rrëzohet edhe i imi!

Kryesuesi – Atëherë po e vendosi në votim edhe propozimin e Bejtullah Deliu, kush është PËR?

Kundër?...Abstenim kemi?... Atëherë me 12 vota për, 14 kundër dhe 1 abstenim, nuk kalon propozimi i Bejtullah Deliu për ridestininimin e mjeteve. Po e vendosim këtë pikë të rendit të ditës si tërësi në votim, kush është për miratimin e kësaj pike të rendit të ditës? Kundër? Abstenim? Atëherë kemi 4 abstenime, 8 kundër dhe 15 pro, kështu miratohet shqyrtimi dhe miratimi i vendimit për bartjen e mjeteve rezervë në investime kapitale. Pauzë 5 minuta, rikthehemi. Vazhdojmë te pika e 4 e rendit të ditës aty ku edhe kemi mbetur shqyrtimi dhe miratimi i vendimit për themelimin e komiteteve për arsim dhe komitetit për shëndetësi dhe për kujdesje sociale, ndonjë prej ekzekutivit të na prezantoj këtë pikë..., atëherë Burim Krasniqi po e prezanton këtë pikë.

Burim Krasniqi – Faleminderit kryesues, meqenëse në KPF kam qenë propozues i kësaj edhe me kërkesën e ekzekutivit e arsyetoj. Arsyeja e themelimit të këtyre dy komiteteve është ajo sepse edhe si Burim edhe si LDK vlerësojmë që prej sektorëve kryesor në komunën e Rahovecit që ndërlidhen me pjesën e administratës janë shërbimet shëndetësore dhe arsimi. Si e tillë besoj që duhet të jenë dy komitetet dhe të themelohen si vendim me rekomandim me përfshirje të të gjitha subjekteve politike në këto dy komitete meqenëse janë katër.

Në parim nuk mendoj që komiteti të luaj rolin e hetuesit, por komiteti do ta luaj rolin t'i gjëj lëshimet me qëllim të krijojmë në kualitet sa më të mirë në arsim dhe shëndetësi.

Kryesuesi – Faleminderit Burim. Atëherë po e vendosim në votim pikën e katërt të rendit të ditës, kush është PËR?... më shumicë unanime aprovohet vendimi për themelimin e komiteve për arsim, për shëndetësi dhe për kujdesje sociale. Vazhdojmë te pika e 5 e rendit të ditës; Shqyrtimi dhe miratimi i vendimit për përbërjen dhe organizimin e komitetit për arsim. Këtu janë gjithsej 5 anëtar, ku 4 delegohen prej kuvendit komunal dhe 1 ekspert i jashtëm me thirrje publike, që për këtë punë merret zyra ligjore apo sekretaria e kuvendit. Atëherë shkojmë me propozime duke filluar me grupin më të madh të asamblistëve, fjalën e ka Besë Bytyqi.

Besë Bytyqi - Faleminderit shumë kryesues, meqenëse sot Albani e ka ditëlindjen, atëherë në e propozojmë Alban Bajraktarin për këtë komitet.

Merisa Sharku – Përshëndetje për të gjithë, ne për këtë komitet e propozojmë Leonard Morinën.

Edona Kryeziu – Ne si grup i LDK-së, propozojmë zonjën Fahrije Lushi.

Bejtullah Deliu – Faleminderit kryesues, ne e propozojmë Sejfullah Sejfullahun.

Kryesuesi – Besoj që anëtarët e propozuar prej grupeve të asamblistëve nuk janë pjesë e komiteve tjera, atëherë kemi 4 emra (anëtarët e komitetit për arsim) nga grupet e asamblistëve: Alban Bajraktari, Leonard Morina, Fahrije Lushi dhe Sejfullah Sejfullahu. Po vendosim në votim, kush është për?... Me shumicë unanime aprovohet vendimi për përbërjen dhe organizimin e komitetit për arsim. Po vazhdojmë me pikën e 6-të, shqyrtimi dhe miratimi i vendimit për përbërjen dhe organizimin e komitetit për shëndetësi dhe për kujdesje sociale. Gjithashtu edhe ky komitet përbëhet prej 4 anëtarëve të kuvendit ku i ftojme grupet e asamblistëve për propozimet, fjalën e ka grupi i Aleancës:

Besë Bytyqi – Përshëndetje, kësaj radhe nuk e kemi askënd me ditëlindje, e propozojmë Shukrije Himaj, e cila do të na bie një tortë.

Leonard Morina – Përshëndetje, faleminderit kryesues, propozojmë Vlora Vuçitërna.

Eqerem Spahiu – Faleminderit kryesues, ne si LDK e propozojmë Lirigzon Kastratin.

Rasim Fazliu – Faleminderit kryesues, për komitetin për shëndetësi dhe për kujdesje sociale e propozojmë Amir Vuçitërna.

Kryesuesi – Faleminderit atëherë është kompletuar edhe komiteti për shëndetësi dhe për kujdesje sociale gjithsej me 4 emra nga kuvendi komunal: Shukrije Himaj, Vlora Vuçitërna, Lirigzon Kastrati, Amir Vuçitërna. Po e vendosim në votim, kush është për?... Me shumicë unanime aprovohet vendimi për përbërjen dhe organizimin e komitetit për shëndetësi dhe për kujdesje sociale. Vazhdojmë me pikën e 7-të: Shqyrtimi dhe miratimi i draft rregullore për dhënien e titujve të nderit, dekoratave dhe çmimeve nga komuna e Rahovecit, e ftoj drejtorin e kulturës z. Afrim Dina t'a prezantoj këtë pikë.

Afrim Dina – Faleminderit kryesues, i nderuar kryetar, nënkryetar, kolegë drejtor, të nderuar anëtarë të kuvendit. Para jush kemi draft rregulloren për dhënien e titujve dhe dekoratave në komunën e Rahovecit e cila i ka munguar komunës tonë dhe për herë të parë hyn në proces që edhe komuna jonë të ketë një rregullore të tillë. Me datë 3 shkurt të vitit 2022 është formuar grupi punues nga kryetari i komunës. Gjatë takimeve ky grup punues ka shqyrtuar të gjitha format dhe të dhënat që komuna jonë të ketë këtë rregullore duke u konsultuar edhe me komunat e tjera që e kanë këtë rregullore. Draft rregullorja i ka kaluar të gjitha procedurat ligjore, me datë 28.03 ka qenë në diskutim publik me çrrastë ka përmbushur afatin kohor ligjor, kurse me datë 12 prill kemi mbajtur takim publik me qytetarë në sallën e kuvendit ku kemi pranuar edhe komente të cilat i kemi implementuar në draft rregullore. Poashtu në mbledhjen e fundit të KPF-së, pasi që jemi trevë bujqësore, kemi pasur një propozim nga asamblisti Rumir Zhuniqi që në rregullore të përfshihet edhe çmimi “Bujku i vitit” të cilin hyjnë të gjithë; fermerët, bletarët etj... Në material i keni të gjitha të cekura, rregullorja përbëhet nga: Qytetar nderi, dekorata “Ukshin Hoti”, dekorata “Dr. Ali Sokoli”, medalja e lirisë, çmimi letrar “Sylejman Krasniqi”, çmimi “Bujku i vitit”, çmimi “Lexuesi i vitit”, medalja “Sportisti i vitit” dhe mirënjohje apo falënderime. Pas shqyrtimit kërkoj nga ju që t'a aprovon, faleminderit shumë.

Kryesuesi – Faleminderit drejtor, për këtë pikë të rendit të ditës hapet diskutimi, nëse ka dikush prej anëtarëve ndonjë propozim? Po, Bejtullah Deliu e ka fjalën.

Bejtullah Deliu – Faleminderit kryesues, faleminderit për shpjegime i nderuar drejtor. Është shumë e qëlluar që “Bujku i vitit” të përzgjidhet, kisha dashur të kemi mirëkuptim nga asamblistët dhe ta shtojmë edhe një pikë, si të cilësohet si çmim apo dekoratë, besoj që si dekoratë do të ishte më mirë, “Artisti i vitit”. Një elaborim të shkurtër pse po kërkojë një gjë të tillë: E kemi dëshmorin Avdullah Bugari që shumë kohë para luftës na ka argëtuar dhe gëzuar me humor, në atë kohë isha i vogël, por e përcjellja me vëmendje dhe më mbesin në kujtime pjesët humoristike të tij. Është fatkeqësi që në atë kohë nuk ka mundur të jetë aktor profesional, por është profesional me veprat që i ka lënë dhe është një ndër dëshmorët e parë që ka rënë (17 korrik) në ofensivën e Rahovecit. Nëse gjejmë mirëkuptim nga asamblistët kisha dashtë të kemi një dekoratë si “Artisti i vitit- Avdullah Bugari”. Faleminderit shumë, kërkoj përkrahje nga të gjithë.

Burim Krasniqi – Faleminderit kryesues, unë kam vetëm disa finesa të vogla të draft rregullorja. Te neni 4 pika 8, çmimi “Lexuesi i vitit” besoj që duhet të plotësohet, ku thotë: Çmimi lexuesi i vitit t’i jepet lexuesit-es banor i komunës së Rahovecit për numrin më të madh të librave të lexuara gjatë një vitit kalendarit i cili është anëtar i bibliotekës komunale “Sylejman Krasniqi” dhe bibliotekave tjera. Çmimi i rëndomtë jepet një herë në vit por jo domosdoshmërisht, këtë në fund është mirë ta heqim, sepse është mirë ta lemë vetëm një herë në vit sepse numri i lexuesve po na bie vazhdimisht, e kjo “çdo vit” e bënë një garë ose nxitje për lexuesit. Dekorata për humanizëm dr. “Ali sokoli” neni 6 pika 4, mund të jetë pllakë metalike apo dekoratë në letër kartoni, këtu mendoj që duhet të specifikohet; duhet të jetë pllakë metalike, t’ia heqim këtë “apo”, ky është propozim i imi çështje tjetër është se si votohet nga delegatët e asamblesë komunale. Neni 7 besoj që duhet pak të riformulohet, thotë; pas aprovimit të rregulloret nga kuvendi i komunës për dhënien e dekoratave, kryetari i komunës ia adreson dekoratën solemn ish të dekoruarit. Kjo “pas” aprovimit nuk besoj që ka vend, por duhet të specifikohet dekoratat, medaljet, mirënjohjet i shpërndaj kryetari i komunës, jo “pas aprovimit” se kur të aprovohet kjo defakto me automatizëm kjo kalon, thjesht propozoj të riformulohet. Pika 3 neni 7 në rast se personaliteti nuk jeton, pranimin e dekoratës mund ta bëjë anëtar i afërm i familjes, apo personi i afërm i të dekoruarit, “jo mund ta bëjë” por e bënë.

Rasim Fazliu – Faleminderit kryesues, do të ndalëm te neni 7 pika 3, sapo e përmendi i nderuari Burimi Krasniqi, këtu po propozoj kështu; në rast se personaliteti nuk jeton më, (presje) vazhdon fjalia... dekoratën mund t’a pranojë (jo, ta bëjë, dekorata pranohet) anëtar i afërm i familjes etj.. etj... Kjo nuk d.m.th. që është ashtu si po e them unë, në çoftëse nuk është kështu, nuk ia “prishi” askujt.

Kryetari – E dëgjova me vëmendje Bejtullah Deliu. Avdullah Bugarin, dëshmorin, unë personalisht e kam njohur kemi qenë bashkëveprimtarë në kuadër të lëvizjes popullore për republikën e Kosovës, jam dakord. Ekziston një situatë psh; janë vetëm çmimi “Sylejman Krasniqi” dhe çmimi “Ukshin Hoti”, ne i kemi mbi 120 dëshmorë duke menduar të bëjmë një zgjidhje të mirë që jam dakord, të hapim tema tjera për shkak të ndjeshmërisë, kualiteteve të dëshmorëve, heronjve etj.. d.m.th deri tani është vetëm Ukshin Hoti dhe Sylejman Krasniqi, nuk ka tjetër. Me këtë që po them, po e lus Bejtullahun që ne duhet të mendojmë ndoshta më ndryshe, e jo t’i fusim në rregullore çmime që sot i kemi dëshmorë. Paramendojeni në i kemi 5 heronjtë të shpallur në komunën tonë dhe 100 e sa dëshmorë dhe rregullorja ndoshta nuk ka mundësi t’i përfshijë të gjitha ato kualitete të veçanta që kanë mundur t’i kenë. Prandaj t’u kisha lutur me shumë respekt që nuk kisha pas dëshirë të jenë pjesë e rregullores sot, sepse standardi kryesisht është; qytetar nderi i komunës, në këtë rast ne e kemi themeluar medaljen Ukshin Hoti, çmimin letrar Sylejman Krasniqi, pastaj një figurë Ali Sokoli, që ka shkollë në Prishtinë me këtë emër, personalitet shumë i rëndësishëm, bujku i vitit shumë çmim i mirë, mund të jetë edhe artisti i vitit, por jo të jetë me emër dekorata, të kemi pak konsideratë sepse mund të kemi edhe fjalë të ndryshme, ku mbeti ky e ku mbeti ai?! I kemi 120 edhe jam krenar që i kemi. Besoj që më kupton çka po them, kemi shumë, vetëm në Krushë janë 20, në fshat timin janë 5, në secilin fshat e në qytet janë 30, është pak problem të themelojmë medalje të veçantë me emër mbiemër. Medalje si artist ose humorist i vitit jemi

shumë në rregull nëpërmjet kësaj ne mund t'i shpjegojmë karakteristikat që filan dëshmorë ka pas këtë afinitet etj... po me ja vë emrin e veçantë së pari ty të del problem me disa tjerë, në kuptimin e asaj na keni harruar neve të tjerëve, ndoshta në situata të mëvonshme mund të gjejmë edhe ndonjë personalitet që kish me qenë më gjithëpërfshirës. Ali Sokolin edhe Ukshin Hotin e gjithë Kosova e njeh, si shkrimtar e patriot Sylejman Krasniqin të gjithë shqiptarët e njohin, janë tri personalitete që në një farë mënyre askush nuk kundërshton asgjë. Andaj iu kisha ftuar për miratim, me ndonjë korrigjim aty këtu, rregullore kjo që komunës tonë i ka munguar deri sot.

Bejtullah Deliu – Kryetar, me këto elaborime e sqarime nuk do mend që mundemi të mirëkuptohemi. Unë me artin emocionalisht jam i lidhur që në vegjëli dhe e kam përcjellë bukur shumë humorin e Avdullah Bugarit nuk është e rastësishme që e cekta si emër. Pajtohem me juve që mund të ngritët një paralele bukur e madhe sepse komuna jonë ka dëshmorë më së shumti në Kosovë dhe poashtu mund të jetë dikush i përafërt me aktivitetin e dëshmorit Avdullah Bugari, nëse kolegët e shohin që kjo mund të jetë një veprim jo i duhur që tjerët do të lëndohen, une nuk jam për t'i lënduar, por nëse nuk mund të emërtohet "Avdullah Bugari", së paku artisti i vitit duhet të figuroj sepse arti me ardhjen e juaj kryetar ka stagnuar, por duhet të gjallërohet pak.

Feriz Thaqi - Përsëritet kryesues, përsëritet kryetar, vetëm desha t'i tregoj Bejtullahut se në komunë i kemi 119 dëshmorë, në mesin e tyre janë 5-6 artistë edhe mirë është me ia dhënë çmimin e vitit një artisti, por jo me emra, të shkojmë me radhë kishte me qenë më mirë, faleminderit shumë.

Merisa Sharku – Përsëritet për të gjithë, rreth kësaj pike unë e kam një pyetje. Sigurisht që përzgjedhjen e këtyre personaliteteve e bënë një komision, kush e përzgjedh atë komision që e bënë përzgjedhjen e këtyre çmimeve?

Edona Kryeziu – Atëherë përsëritet për të gjithë, i nderuari kryesues, kryetar, ekzekutiv, drejtorë të drejtorive dhe të gjithë të tjerët që janë prezent në këtë seancë. Është e vërtetë ashtu siç e citoj edhe drejtori që draft rregulloren e kemi pas një kohë shumë të gjatë në dorë dhe e kemi lexuar mëse me vëmendje, e gjitha që më ka bërë përshtypje është që këtu nuk ceket askund që ekziston një kriter që duhet ta përmbush dikush përveç aplikimit. Në emër timin personal dhe në emër të grupit të asamblistëve të LDK-së, propozoj që të bëhet plotësimi ose të nxirret një rregullore që i përket kriterëve për aplikim, ose më konkretisht, si e bën përzgjedhjen komisioni për dhënien e titujve.

Sejfullah Sejfullahu – Faleminderit kryesues, është mirë që u pajtuam për ndarjen e kësaj dekorate për artist, kolegja Merisa pyeti për komisionin, ndarsa siç e tha edhe Ferizi janë 5-6 artistë, dy prej tyre që janë dëshmorë profesor Muhamet Malësori dhe Avdullah Bugari me të cilët kam pasur fat të bashkëpunoj gjatë e gjatë e gjatë dhe për këtë arsye nuk e di si, por unë dua të jem patjetër në komision. E di kryetar që i keni njohur edhe ju, megjithatë më vije shumë mirë që është bërë kjo zgjidhje.

Kryetari – Faleminderit, unë jam dakord me atë që tha Bejtullahu, çmimi artisti i vitit. Ne kemi shumë shokë dëshmorë që janë artistë, i përmendi disa Sefa, disa Ferizi disa i din Bejta e disa të gjithë i dini. Jam dakord t'i nderojmë njerëzit me çmimin artisti i vitit, por pa emërtim. Ndërsa sa i përket kriterëve ato janë të përshkruara me rregullore p.sh: të marrim shembull çmimin Ukshin Hoti, një personalitet që i ka kontribuar vendit, çështjes kombëtare, me vlera, me integritet personal, qytetar, kombëtar etj.. mund të jetë i jashtëm dhe i brendshëm. Kush mund ta merr çmimin "Ali sokoli", një personalitet që i ka kontribuar po supozojmë çështjes kombëtare, por ndoshta edhe ndonjë profesionist apo mjek. Për shembull është nder që çmimin "Ali Sokoli" ta ketë Samedin Haxhijaha veç supozim dhe kot po flas, por ka kontribuar shumë në mjekësi dhe në çështje kombëtare. Cilat janë kriteret për qytetar nderi i komunës? Po zakonisht ai që ka kontribuar diçka për këtë komunë, që ia bie ndonjë donacion kësaj komune et.. mund të jenë edhe të komunës së Rahovecit po edhe jashtë saj.

Sejfullah Sejfullahu – Shumë shkurt kryetar, po insistoj te çmimi "Ukshin Hoti" prej kriterëve do të ishte mirë që fituesi i çmimit mos të jetë faktor politik apo që është i ndonjë subjekti politik.

Merisa Sharku – Për këtë arsye e kërkova replikën, sepse nuk mora përgjigje se kush e krijon komisionin?!

Kryetari – Komisionin e krijon kryetari i komunës, normalisht që kryetari i komunës në diskrecionin e vet e ka edhe të ftoj edhe anëtarë të kuvendit të komunës.

Merisa Sharku – Kërkesa ime kish me qenë që këto komisione të krijohen prej kuvendit komunal dhe kur të bëhet ndarja e çmimeve le të jetë më gjithëpërfshirëse, do të bëhet përzgjedhje më e drejtë për mendimin tim, nëse në komision janë anëtarët e kuvendit.

Kryetari – Në këto raste të jemi të sigurtë që subjektet politike nuk është dashur të kenë peshë, por institucionet, gjithsesi raporti edhe kriteret bëhet në kuvend të komunës sepse nëse ndokush interesohet, atëherë kuvendi i komunës ka informata zyrtare dhe legale, por kryesisht kriteret fare nuk do të jenë politike. Ne do të kërkojmë ndihmën e kuvendit pas miratimit të rregullores sepse një figurë apo personalitet ka një konsensus të përgjithshëm është më mirë. Sigurisht komisioni ka punë të mundimshme sepse duhet të jetë përmbajtësor dhe duhet të ketë shumë të dhëna për një personalitet të rekomanduar për t'ia dhënë një çmim apo dekoratë të caktuar.

Merisa Sharku – Pikërisht për këtë arsye mendoj që nëse është gjithë përfshirja, atëherë nuk do të jetë politike, e nëse përfshihet vetëm një parti politike që jeni në pushtet në ndarje të çmimeve, atëherë është më shumë politike se sa nëse është gjithëpërfshirës komisioni.

Kryetar - Merisa, në raport me kuvendin e komunës së Rahovecit, unë operoj si kryetar i komunës. Në parti që jap çmim tjetër, Ramush Haradinaj e ka çmimin e vet. Ne po flasim si institucione, secili subjekt politik ka edhe dekorata e çmime të veta. Unë jam i obliguar të respektoj kriteret me një komision që vlerëson situatën, rekomandon dhe vendos.

Kryesuesi – Atëherë me propozimin e Bejtullah Deliut dhe me vërejtjen e Burim Krasniqit po e vendosim në votim miratimin e draft rregullores për dhënien e titujve të nderit, kush është PËR? Atëherë me shumicë unanime miratohet edhe draft rregullorja për dhënien e titujve të nderit, dekoratave dhe çmimeve nga komuna e Rahovecit. Kalojmë te pika e 8 e rendit të ditës: Shqyrtimi dhe miratimi i vendimit për aprovimin e listës së anëtarëve të zgjedhur të këshillit të fshatit Hoçë e madhe. Atëherë e ftoj anëtarin e kuvendit, njëkohësisht edhe kryetarin e komisionit ad hoc z.Lirigzon Kastrati ta prezantoj këtë pikë të rendit të ditës dhe të na raportoj për ecurinë e takimit të parë si komision.

Lirigzon Kastrati – Faleminderit kryesues, i nderuar kryetar, drejtorë, kolegë asamblistë. Më lejoni të iu njoftoj që komisioni ad hoc për përzgjedhjen për këshillin e fshatit Hoçë e Madhe, sipas vendimit të kuvendit komunal nr.01299/2022 të datës 30 mars 2022 dhe në mbështetje të ligjit nr. 04L-62 për fshatin Hoçë e Madhe dhe udhëzimit administrativ të ministrisë së mjedisit dhe planifikimit hapësinor nr.11/2014 për themelimin, zgjedhjen, përgjegjësitë dhe funksionimin e këshillit për fshatin Hoçë e Madhe, komisioni ad hoc për përzgjedhjen e kandidatëve sipas ftesës publike të datës 11.03.2022 nr.283/2022 dhe në pajtim me nenin 4 dhe 7 të udhëzimit administrativ nr.11/2014, kuvendit komunal ia dorëzojmë listën e përzgjedhur të kandidatëve për votim. Siç e dini një anëtar i këshillit është nga kisha ortodokse, ai është Zvezdan Misic, kurse emrat e kandidatëve të përzgjedhur janë; Nahit Elshani, Munib Durguti, Kreshnik Haxhijaha, Mejreme Gërguri-Krasniqi, Miroslav Lukic, Aleksandër Misic dhe Bojana Kalamic. D.m.th kuvendi komunal do t'i përzgjedh 4 anëtarë, dy shqiptarë dhe dy nga komuniteti Serb.

Kryesuesi – Faleminderit Lirigzon, vetëm një plotësim edhe një emërohet nga kisha ortodokse nëse nuk gaboju sipas udhëzimit administrativ, atëherë meqë janë 7 emra, ka dikush ndonjë propozim- vërejtje rreth raportit të kryetarit të komisionit? Atëherë po vazhdojmë me votim, kuvendi duhet të vendos për anëtarët e këshillit të fshatit Hoçë e Madhe. I kemi me numër rendorë dhe kushdo prej kandidatëve që ka më shumë vota PËR bëhet anëtar i këshillit të fshatit Hoçë e Madhe. Numri i parë; Nahit Elshani, kush është për?...kundër?...atëherë i kemi votat e barabarta me 15 vota për dhe 15 kundër, kuorumi është prej 30 anëtarëve të kuvendit. Po vazhdojmë edhe me anëtarë të tjerë dhe më pas përcaktuar siç po duket do të jetë kryesuesi i kuvendit dhe vendosi në fund. Numër dy; Munib Durguti, kush është për?...kundër?... kemi 13 vota për dhe 15 kundër për Munib Durgutin. Numër tre; Kreshnik Haxhijaha, kush është për?...kundër?... abstenim?... 15 vota për, 12

kundër për Kreshnik Haxhijahën. Mehreme Gërguri-Krasniqi, kush është për?... kundër?... Atëherë rezultati është ky; Nahit Elshani i ka 15 për, 15 kundër dhe një votë e imja shkon për si votë e dyfisht si kryesues i kuvendit. Munib Durguti i ka 13 vota për, 15 kundër. Kreshnik Haxhijaha ka 15 vota për, 12 kundër dhe Mehreme Gërguri- Krasniqi i ka 15 vota për 7 kundër. Atëherë kështu, prej katër kandidatëve shqiptarë për këshillin e fshatit Hoçë e Madhe anëtarët e kuvendit kanë vendosë me këtë rezultat ku Nahit Elshani ka 15 vota për, 15 kundër? Sipas rregullores, kur votat janë të barabarta për çfarëdo votimi, kryesuesi e ka të drejtën e votës së dyfisht me çrast po e shfrytëzoj dhe po votoj për Nahit Elshanin, njëri prej anëtarëve të këshillit të fshatit Hoçë e Madhe. Munib Durguti ka rezultat 13 për dhe 15 kundër, ka më pa vota se dy kandidatët tjerë shqiptarë dhe Munibi bie. Kreshnik Haxhijaha ka 15 vota për, 12 kundër dhe Mejreme Gërguri-Krasniqi ka 15 vota për, 7 kundër. Duke marr parasysh votat kundër në këta dy kandidatë, Mejreme Gërguri është anëtare tjetër e këshillit të fshatit Hoçë e Madhe. Kështu kompletohet me dy anëtarë të shqiptarëve që e përbejnë këtë këshill. Ju kisha lutur për qetësi, për çfarëdo ankese që e keni, mund ta bëni në instancat që e përcaktojnë këtë punë. Sa për sqarim, disa gjëra nuk ka nevojë as për diskutim, Nahit Elshani nuk i ka 15 vota për, por 16. Atëherë po vazhdojmë përzgjedhjen edhe dy kandidatëve të komunitetit Serb; ... vazhdojmë me pauzë 5 minuta dhe rikthehemi në sallë. Atëherë vazhdojmë duke iu lutur për qetësi, përsëritet edhe një herë për të gjithë të nderuar anëtarë të kuvendit komunal. Kemi mbet te pika e 8 e rendit të ditës, para se të fillojmë me votimet e komunitetit Serb, si kryesues do ta dërgoj një shkresë në MAPL por edhe kështu publikisht për ata që e monitorojnë komunën e Rahovecit që ta shqyrtojnë situatën se si ka ndodhë votimi dhe te numri i votave që i kanë marrë kandidatët. Nëse pas monitorimit nga MAPL numri i votave nuk është në përputhje me numrin e votave me të cilin është marr vendimi, atëherë ky vendim do të kthehet në pikën zero në votimin e kandidatëve. Po fillojmë me votimin e kandidatëve të komunitetit Serb, me numër rendor 5, Miroslav Lukic, kush është për?...kush është kundër?...abstenim?... kandidati tjetër numër rendor 6, Aleksandër Micic, kush është për?... nuk ka vota për! kundër?... abstenim?...kandidati i tretë nga komuniteti serb, Bojana Kalamic, kush është për?...kundër?...abstenim? Atëherë me 12 vota për, 1 kundër dhe 1 abstenim Miroslav Lukic është njëri nga anëtarët e këshillit të fshatit Hoçë e Madhe nga komuniteti serb. Aleksandër Micic, ka 0 vota për, 10 kundër, 1 abstenim dhe kandidati me numër rendor 7, Bojana Kalamic ka 6 vota për, 0 vota kundër, 4 abstenime. Pra, Miroslav Lukic dhe Bojana Kalamic janë dy anëtarë të këshillit të fshatit Hoçë e Madhe nga komuniteti serb dhe po e vendosim në votim këshillin e fshatit Hoçë e Madhe me këtë përbërje, kush është për?...kundër?...abstenim?...me 16 vota për, 5 vota kundër dhe 1 abstenim, miratohet edhe pika e 8 e rendit të ditës. Kalojmë te pika e 9-të; Shqyrtimi dhe miratimi i vendimit për ndryshimin dhe plotësimin e vendimit nr.296/2022 i datës 30.03. 2022 për caktimin e lokacionit për ndërtimin e morgut për nevojat e komunitetit të fshatit Hoçë e Vogël dhe pika e 10-të e rendit të ditës: Shqyrtimi dhe miratimi i vendimit për ndryshimin dhe plotësimin e vendimit nr.295 për 22 i datës 30.03.2022 për caktimin e lokacionit për ndërtimin e objektit për zhvillimin e aktiviteteve të ndryshme për nevojat e komunitetit të fshatit Çifllak. E ftoj drejtorin Afrim Oruqi që t'i prezantoj këto dy pika të rendit të ditës.

Afrim Oruqi – Faleminderit kryesues, të nderuar anëtarë të kuvendit, para jush në bazë të ligjeve të republikës së Kosovës, kemi vendimin për ndryshimin dhe plotësimin e vendimit nr.019 nr.296/22 i datës 30.03.2022 për caktimin e lokacionit për ndërtimin e morgut për nevojat e komunitetit në fshatin Hoçë e Vogël, me këtë vendim ndryshohet dhe plotësohet vendimi nr.01 numër 296/22 i datës 30.03.2022 për caktimin e lokacionit për ndërtimin e morgut në fshat. Ky ndryshim ka ardhë si pasojë e rekomandimit nga ministria e mjedisit planifikimit hapësinor dhe nga MAPL pas nenin 3 të vendimit bazik 01/296-22 i datës 30.03.2022 për caktimin e lokacionit për morg, pason pjesa e parcelës në sipërfaqe prej 5 ari e 500 m katror, në të cilën parashihen që të ndërtohen morgu. Kërkesë e këtyre dy ministrive ka qenë që në vendim të parashihet edhe se si është e destinuar kjo parcelë sipas planit zhvillimor komunal. Ju ftoj që pas shqyrtimit të votoni propozim vendimin me ndryshim për ndërtimin e morgut në zonën kadastrale Hoçë e Vogël. Të nderuar anëtar të KPF-së para jush kemi vendimin për ndryshim dhe plotësimin e vendimit 019/295-22 i datës

30.03.2022 për caktimin e lokacionit për ndërtimin e objekteve për zhvillimin e aktiviteteve të ndryshme për nevojat e komunitetit të fshatit Çifllak. Gjithashtu këtë vendim e kemi pasur muajin e kaluar, mirëpo pas rekomandimeve të ministrisë së mjedisit dhe MAPL-së të cilët kanë kërkuar që në vendim të parashihet edhe sipas planit zhvillimor komunal se kjo parcelë të ndahet dhe ndërtohet ashtu si parashihet, pjesa e parcelës në sipërfaqe prej 3 ari, në të cilën parashihet të ndërtohet objekti sipas pikës 1 dhe 2 të këtij vendimi sipas PZHK-së komunale me nr. 01/2566 i datës 30.05.2013 që gjendet brenda zonës ndërtimore. Ftoj anëtarët e kuvendit që pas shqyrtimit të votojnë propozim vendim ndryshimin për ndërtimin e objektit për nevojat e komunitetit në fshatin Çifllak.

Kryesuesi - Faleminderit drejtor, dikush prej anëtarëve të kuvendit në lidhje me këto dy pika?...Nëse jo, atëherë ... po, Lirigzon Kastrati e ka fjalën.

Lirigzon Kastrati – Faleminderit kryesues, atëherë këto dy pika të rendit të ditës kanë kaluar në seancat e kaluara, kështu që jemi pro në emër të grupit.

Kryesuesi – Faleminderit Lirigzon, atëherë po e vendosim në votim fillimisht pikën e 9 të rendit të ditës, kush është për? Me shumicë unanime aprovohet edhe plotësim ndryshimi i vendimit 296/22 dhe kështu përfundon pika e 9-të e rendit të ditës, vazhdojmë me votim për pikën e 10-të, kush është për?... me shumicë unanime aprovohet edhe pika e 10-të e rendit të ditës, vazhdojmë te pika e 11-të; Raporti vjetor i punës së komitetit të auditimit për vitin 2021, e ftojme kryesuesi e komitetit për prezantim të raportit.

Sead Rama – Faleminderit kryesues, përshëndetje për të gjithë asamblistët. Raporti vjetor i punës së komitetit të auditimit për vitin 2021, komiteti i auditimit ka shqyrtuar raportet auditimit të brendshëm dhe raportin vjetor të auditorit gjeneral për vitin 2020, gjithashtu komiteti i auditimit ka mbajtur 5 seanca ku janë shqyrtuar pika të ndryshme sipas programit dhe planit të punës për vitin 2021. Seanca e parë ka qenë shqyrtimi i raportit vjetor të auditimit të brendshëm për vitin 2020, shqyrtimi dhe aprovimi i draft statusit të komitetit të auditimit të brendshëm si dhe të ndryshme. Seanca e dytë; shqyrtimi i raportit të auditimit të brendshëm për drejtori për administratë të përgjithshme, shqyrtimi i raportit të auditimit të brendshëm për drejtori, shëndetësi dhe përkujdesje sociale. Seanca e tretë; shqyrtimi i raportit të auditimit të jashtëm për vitin 2020, shqyrtimi i raportit final të zyrës së prokurimit dhe shqyrtimi i raportit të drejtorisë për inspektim. Seanca e katërt; shqyrtimi i raportit të brendshëm për zyrën e prokurimit, shqyrtimi i raportit të brendshëm për drejtori për inspektim, shqyrtimi i raportit të brendshëm për drejtori komunal të arsimit. Seanca e pestë; shqyrtimi i raportit të brendshëm për drejtori kadastër, gjeodezi dhe tatim në pronë, shqyrtimi i raportit të brendshëm për drejtorinë e shëndetësisë dhe mirëqenies sociale dhe të ndryshme. Janë dhënë shumë rekomandime me të cilat si komitet i auditimit kemi participuar në performancë, nëse keni ndonjë pyetje?

Lirigzon Kastrati – Faleminderit kryesues, përshëndetje për drejtorët, kolegët, përfaqësuesit e këtij komiteti. Fillimisht më lejoni të iu njoftoj se cilat udhëzime - ligje e rregullojnë këtë komitet. Ligji nr.06L021 për kontrollin e brendshëm të financave publike neni 20 e përcakton punën e komitetit të auditimit. Udhëzimi administrativ nr.01/2019 për themelimin dhe funksionimin e komitetit të auditimit në subjektin e sektorit publik, neni 7 janë përgjegjësitë e komitetit të auditimit, neni 10 e kemi raportin vjetor të komitetit të auditimit. Ne e kemi pranuar një raport aty është një përmbledhje e procesverbaleve, mirëpo si grup i asamblistëve i kemi edhe disa rekomandime; ligji mbi auditorin e brendshëm jep komitetit të auditimit autoritetin dhe përgjegjësinë si në vijim; siguroj se menaxhmenti lartë dhe personeli i sektorit publik zbatojnë në kohë rekomandimet e bëra nga njësia e auditimit të brendshëm, lejojnë që njësia për auditim të brendshëm të vlerësoj shkallën deri ku janë zbatuar rekomandimet e mëhershme dhe shkallën e ndonjë përmirësimi që ka rezultuar. Ne e kemi një raport të vitit 2020 të auditorit të jashtëm, aty janë disa rekomandime, kërkoj nga përfaqësuesi të na tregoj për rekomandimet që janë zbatuar dhe që janë përfunduar nga komiteti i auditimit. Një vështrim i shkurtër në raportin e komitetit të auditimit, raporti i komitetit të auditimit për vitin 2021 ka disa mangësi të cilat duhet t'i prezantojmë para kuvendit komunal. Mangësitë e vërejtura në raport janë si në vijim; Këtij raporti i mungon përshkrimi i shkurtër i detyrave dhe përgjegjësi të komitetit të auditimit si

organ këshillëdhënës për mbikëqyrjen e funksionimit të kontrollit të brendshëm. Raporti është një përmbledhje takimesh të komitetit ku bën përshkrimin e raportit të auditorit të brendshëm sipas drejtorive, formati i raportimit ka dizajn të koklavitur, i cili nuk ia mundëson kuvendarëve të kenë një pasqyrë të qartë lidhur me ecurinë e menaxhimit të parasë publike dhe pasurisë publike. Raporti nuk ka të nxjerra dhe përfundime lidhur me; vlerësimet e tij për kontrollin e brendshëm, sfidat, punën e njësisë së auditimit të brendshëm, pengesat dhe të arriturat në zbatimin e rekomandimeve. Si grup i asamblistëve rekomandojmë; në raport të prezantohet qëllimi, detyrat dhe përgjegjësitë e komitetit të auditimit, të hartohet një format i raportimit i cili duhet të jetë i qartë dhe informues për anëtarët e kuvendit komunal, raporti në fund të ketë konkluzione dhe rekomandime që ka vërejtur në vitin fiskal për të cilat duhet të ketë njoftime menaxhmenti i lartë, në këtë rast kuvendi komunal.

Sead Rama – Sa i përket raportit që është mbajtur në formë të procesverbalit, ne jemi si rekomandues, thjesht nuk marrim vendime, janë auditorët e brendshëm të cilët marrin vendime dhe shumë pika që sipas juve nuk janë bartë e sqaruar aty, janë zgjidhur dhe përmirësuar siç shihet edhe në raportin kryesor të auditorit të jashtëm që çdo vit ka përmirësime.

Rasim Fazliu – E gjitha që tha Lirigzoni, e pranoj d.m.th. ashtu është dhe desha të solidarizohem me të. Të nderuar, në seancën e parë, pika 2 shkruan; shqyrtimi i raportit vjetor të auditimit të brendshëm për vitin 2020, në fakt asgjë nuk shkruan për këtë pikë këtu! Nuk dua të marr kohë e të lexoj, por asgjë hiç, zero. Në fakt komiteti i auditimit duhet t'i paraqes këtu disa të dhëna, sa rekomandime janë shqyrtuar, ku janë ato vërejtje, çka është bërë - tek është bërë, të na bëjë publike këtu, e në fakt në letër ne si anëtar të kuvendit nuk kemi asgjë absolutisht. Për më mirë do të ishte kështu; raporti i auditimit të brendshëm të vije në kuvend, ligji e thotë që ata i japin llogari kryetarit të komunës, shumë e qartë kjo, por kryetari i komunës ka mundësi të na sjellë neve këtu informacione dhe ne ta shqyrtojmë raportin si tërësi se si e ka bërë auditori i brendshëm, e ne ta lexojmë, diskutojmë, kontribuojmë, shqyrtojmë etj.. e kjo nuk po ndodh, ndërsa ju si komitet i auditimit vetëm jeni takuar dhe nuk keni bërë asgjë, ndoshta edhe keni diskutuar, por këtu në letër nuk po thotë asgjë. Tjetra, kur e kthejmë logjikën prapa, jemi në vitin 2022, çfarë logjike është që ne të flasim për vitin 2020 sepse raporti i auditimit të brendshëm duhet të shqyrtohet gjithmonë para auditimit të jashtëm, thjesht diskutimi i bërë duhet të vendoset në letër dhe më pastaj hapet diskutimi dhe kemi çka të flasim, nuk do të thotë të vendosim vetëm vërejtje, ka edhe shumë gjera të mira, mos më keqkuptoni. Faleminderit shumë.

Sead Rama – Faleminderit për këshillën. Në të ardhmen do të zbatohen këto, sepse ne i kemi procesverbalet dhe të gjitha që i kemi diskutuar. Raporti vjetor i auditorit gjeneral për vitin 2020, diskutohet në vitin 2021 sepse ata e sjellin me vonesë, çdo herë një vit mbrapa është, sa për sqarim. Faleminderit.

Kryesuesi – Faleminderit për sqarimet, kështu po kalojmë te pika e 12-të e rendit të ditës; Projektvendimi për caktimin e lokacionit për hapësirë për biznese, poashtu edhe pika e 13-të e rendit të ditës është projektvendimi për shpalljen me interes të përgjithshëm publik parcelën 02756-0 në zonën kadastrale Krushë e Madhe. E ftoj drejtorin e ekonomisë për prezantimin e këtyre dy pikave të rendit të ditës.

Erhan Morina – I nderuar kryesues, i nderuar nënkryetar, të nderuar drejtorë të drejtorive, të nderuar anëtarë të kuvendit, media dhe ju të pranishëm. Para jush keni materialin që bëhet fjalë për dy parcelat të cilat gjenden në Krushë të Madhe, bëhet fjalë për parcelën me nr. të certifikatës së pronësisë 01704-0 në zonën kadastrale në Krushë të Madhe në vendin e quajtur "Rasa sprud" me sipërfaqe 143.712metra katror dhe parcela me nr. të certifikatës së pronësisë 02745-0 me sipërfaqe 381.960 metra katror, të cilat poashtu gjenden në Krushë të Madhe në vendin e quajtur "Rasa sprud". Këto dy parcela janë pronë e komunës të cilat drejtoria për ekonomi zhvillim dhe turizëm dëshiron t'i destinonë si hapësira për biznese, gjithmonë në funksion të krijimit të kushteve sa më të favorshme për bizneset që operojnë në komunën tonë. Vlenë të cekët se këto parcela janë të komunës së Rahovecit dhe nuk ndërron titullari juridik, pronari i tyre mbetet kuvendi komunal i Rahovecit, prandaj ftoj anëtarët e kuvendit komunal që të votojnë këtë pikë të rendit të ditës. Faleminderit... Edhe këtë herë e keni materialin për parcelën me nr. të certifikatës së pronësisë 02756-0 në zonën kadastrale Krushë e Madhe në vendin e quajtur "Paca Paca" me sipërfaqe 197.647m katror. Kjo parcelë është nën menaxhimin e


agjencionit të ujërave dhe të njëjtën pronë e shpallim me interes të përgjithshëm me qëllim që në seancën e radhës edhe kjo parcelë të destinohet si hapësirë për biznese, në material i keni të bashkangjitura edhe fotot, ftoj anëtarët e kuvendit komunal që ta votojnë këtë pikë të rendit të ditës.

Kryesuesi – Faleminderit drejtor, para se t'i vendosim në votim këto dy pika të rendit të ditës, dikush ndonjë diskutim në lidhje me këto?...Atëherë në votim po e vendosim pikën e 12-të të rendit të ditës; projektvendimi për caktimin e lokacionit për hapësira për biznese, kush është për?...kundër?...abstenim?...Atëherë me 12 vota për, pa votë kundër dhe me 2 abstenime, kalon projektvendimi për caktimin e lokacionit për hapësirë për biznese. Vazhdojmë me pikën e 13-të të rendit të ditës; shpallja me interes të përgjithshëm publik parcelën 02756-0 në zonën kadastrale Krushë e Madhe, kush është për?...kundër?...abstenim?...Atëherë me 13 vota për, pa votë kundër dhe 2 abstenime miratohet edhe projektvendimi për shpalljen me interes të përgjithshëm publik të parcelës në fjalë. Kalojmë te pika e 14 e rendit të ditës; plotësim ndryshimi i vendimit për formimin e komisionit për emërtimin dhe riemërtimin rrugëve, rrugicave, parqeve, shesheve dhe lagjeve në komunën e Rahovecit të miratuar nga kuvendi komunal në seancën e kaluar, kush është për?...Me shumicë unanime të votave miratohet edhe propozimi për plotësim ndryshimin për komisionin për emërtimin edhe riemërtimin e rrugëve.

Besë Bytyqi – Faleminderit shumë dhe kërkoj ndjesë që po e marr edhe një min.. kohë. Duke parë që shumë prej kolegëve asamblistë nuk janë këtu në këto pika shumë të rëndësishme të rendit të ditës, në mandatin e kaluar e kemi pas edhe në fillim të seancës edhe në fund të saj të nënshkruhemi, kërkoj nga zyra e kuvendit që të na bie listën e nënshkrimeve në fund të seancës sepse nuk është në rregull që këtu të jemi 15 ose 16, kemi kuorum por nëse 10-të asamblistë kanë dalë edhe nuk janë këtu, atëherë nuk është në rregull. Shumë faleminderit.

Kryesuesi – Faleminderit shumë për kritikën, besoj që kjo çështje do të rregullohet prej seancës së ardhme, deri në seancën tjetër të rregullt, mirë mbetshi.

Mbledhja përfundoj në 16:20


Procesmbajtësi:
Agim Hoti

